

恕谷後集
二



集 後 谷 恕

(二)

著 校 堪 辰 李 焉

恕谷後集卷六

馮先生傳

馮先生名夢徵，字繪升，安州人。以廩生選拔貢士，生而凝厚，篤孝友，繼母趙氏待之厲，先生先其意所欲，陰遂之，遂以底豫。後每有盛威，先生諭之，立霽。當是時，大河北孫徵君鍾元宗、王守仁、刁孝廉、包宗朱熹，講學各著書鳴世。先生亦守程朱說，然結廬白洋淀旁，僻巷自脩，恬如也。已而與堦交，聞堦有較正先儒語，抵書爭之，娓娓數千言，及顏習齋先生與之存學編論，孔孟正旨，又見堦大學辨業，深有省。晚年與習齋結會，共砥鳴呼，自程朱立學道名以來，再變而爲陽明氏，天下分門角戶者，不出二派。先生初堅墨守，末燭康衢，可不謂聞道者與。貧而好義，屢脫人於難，樂誨從遊，老愈恭謹，對客恂恂如後生。然歿後，五子以醇雅世其家。

馮君傳

馮君諱墜，字敬南，代州人也。大父廣東左布政使如京，以春秋名家，世稱曰秋水先生。父雲驢，仕翰林院講官，至禮科給事中。君生而穎異，好經濟，嘗謁魏敏果公象樞，奇之。戊辰聯捷成進士，初補中書，已陞梧州府同知，銜無事，每爲上官剖疏別案事，特薦調補南甯同知。南甯逼左江，與諸土司壤相錯，自吳逆後，伏莽多有，守土置莫誰何。君至，陰誦其一縛致之，訊其黨，皆獲，置魁於法。餘釋署爲鄉役，率土兵伺盜，自

是盜未發而捕已至矣。一巨儉李亞四，聚數百人，伏城鎮北橋，期舉火。諸官出救，踏之大掠。君知偵衆盜盡出，而亞四在，急擒之。羣盜駭散，南甯故以竹結屋，覆之茅，比簷相亞。每災輒延燒十百家。盜因乘之劫略。君命民門庀甕一貯水，驗無水者罰。立保甲，令遇災人撻水一石運至，給籤翌日。按籤有無，施刑賞。又使役巡煇所，非運水及捕火人，卽執懲。由是比年無災，而盜亦熄。歲戊寅，湖廣茶陵州有警，嶺西南羣醜伏蔓南甯營署間。謀旦暮起應，當事者震懼，計之。君曰：「吾行辦之，密廉得其主名，夜呼前釋盜，諭以效力。皆屑涕誓死報。」迺令各招其徒入，卽士兵也。質明，戈兵蟻聚屯城中。當事益大駭，曰：「何爲者？」君曰：「無他也。」行釋去矣。諸奸見兵集，懼伏莫敢動。因按名捕寘之法，而犒士兵以牛酒去。庚辰，攝府印，剔甯關稅弊。巡撫彭鵬疏薦。適君丁外艱，士民攀留不得，至感嘆泣下。辛巳，李壘入都。君浮家都門，萬子斯同亟稱君學者，因相會。抵冬，君延萬子孔氏子尙任王子源及壘論學。壘餽以大學辨業，萬子夙有講會。壬午卒。君乃邀同人十日一會其廬。癸未春，壘又入都。君廣集四方士列講筵，推壘講。壘謝不敏，座或問理氣五行及經義，略陳說。日晡散去。君留壘，喟然問曰：「聖門所重者六藝，今置不問，學術烏乎振？」壘曰：「君知其由耶？」三代以上，以仁義禮智之德出而爲子臣弟友之行，緯以禮樂兵農之事，而其事則必習之學中，一源共委。典樂所以教胄子，大司徒所以教萬民也。無何，遭秦坑口，傳身授之學遂湮。惟古聖載德行與藝諸典籍，幸有存者。於是搜購爬羅，誦說多而習行少，謂傳經爲儒者。至宋明諸儒，又以漢唐僅訓詁，未窺本源，乃舉聖門不可得聞之性天，立主靜觀中致良知等名以補苴之。上之虛摸太極，下之日役章句，至於禮

樂則以爲緩圖射御書數則以爲鄙事將子路之兵冉有之農公西華之相禮俱置學外致使漢唐宋明諸君所與創定宇宙者率用黥盜屠販輩而所謂傳道大儒且高閣束之待異日天下無事命以珥筆講書而已不知伊呂周孔當此時亦祇如此否且禮樂兵農不務則所持以盡行者何事養德者何具而德行亦因以亡矣此學術所以日壞天下所以日靡而不可撻也君立起曰然乃遍究禮樂經濟諸端夜深秉燭偕其四弟歷及子考辨娓娓不休塏復言脩身齊家務君欣然期立見於行初君童歲詩文卽噪人口顧唾棄弗屑嘗學射應弦中相馬驚駿百不失一尤精算術測高量遠求深推計今古伸手布籌咄嗟立辨世傳九章書與西洋算法人或輟轉莫解君一覽立剖輒指畫令人人可曉生有功思凡攻金攻木錐鑿鈴錘之類行則攜之時考次繩度定刻漏早晚地勢向背皆出意解手成小儀器精巧靈通世業家自謂弗及也每言制器今不逮古遠甚如考工記弓人一則妙盡物曲學士不之求工人又沒世不知他率類是嘗欲以所試農田水利軍旅甲冑火攻諸器爲一書又欲推春秋以來日月薄蝕五星行度諸儒同異得失爲一書皆未就見成者僅有諸分指掌測量方程二小帙製器有簡平儀大銅黃道儀小時日晷銅矩度器銅渾儀皮水砲乃甲申正月甫三十八歲遂卒矣

李塏曰聖道豈其莫振也哉何馮君之早折也予初交君時窺其貌矍然目清露詢之則世家貴族疑貌何以不類乃卒短折悲夫卒後聞有訾訾詎才尤見嫉耶抑所見者遠而左右周旋乃未至耶使君不得盡其學將誰尤哉

李贈翁傳

贈翁諱雍熙。號淦秋。先世本聚強。李氏。後徙長山。翁少好義俠。千里朋畢至。擊鮮浮白。抵夜分。鋤強援貧。難立。削牘經紀。出千百金。無遴色。後丁父艱。盡禮已。而執母氏變。比葬。寇斗至。明器僉焚掠。翁大慟。踴身壙中。親友挽之。得不墮。迺挫豪茹長齋。掛牙牌直胸。上鐫母訓。下鏤曰爲善窒惡。長白山故有外舅史侍郎別業。因結茅著方外服。讀丹經其上。而好義急難如故。推弟侄田宅。族戚養於家。俾成立數十人。里人以窘來鬻物。與直而還之。一晷弟爭壟。給以田勸息。乙指甲攘其貲。曰無是也。爲代償。其他已逋贖。掠助昏葬。難數計。邑有巨鎮曰周村。牙僧握權度橋虔。翁僱人充之。稅出囊。不索商一錢。貨兢至。居民亦裕。又立義倉。義學。義塚。偶疾。走望禱者踵接。初翁值明季羣盜起。什伍鄉人。百置長練。以營陳。鄉遇遭樹望樓。外聯木寨。翁身執銳指揮。巨盜慄不敢犯。暮年一日同從兄司寇化熙有所之。翁箬笠寬博。司寇故與隄馬甫上。怒躍。翁提鞭撾後。馬偃伏。循循走。司寇捧腹笑曰。何許道叟而若是。所著有孝行庸言翠岩詩集。雜著藏家塾。子孫繩繩貴顯。仲孫斯義。以進士。今任大理寺卿。贈翁如其官。

李堪曰。王法乾嘗爲堪言。天報德亦報功。而功猶較著。可肘量而指算也。蠡人閭閻泰輕俠好義。子登甲榜。職部郎。劉潤九以質民好行其德。子姓習富。有宦者。翁功更鉅。食報亦鉅。法乾之言不誣矣。翁晚德益進。雜著皆脩齊至道。訓諸孫曰。吾少誤於俠。中嗜黃老。皆非若所宜法也。雖然。漢七國變。周亞夫乘傳車至洛。求得劇孟。喜曰。七國舉大難而不獲孟。知其無能爲也。俠之輕重於世何如哉。吾行天下。每至必詢。

仗義急難人。不概見。感慨繫之矣。

彭山人傳

順治十五年。蠡吾彭之燦南如蘇門。坐餓嘯臺上。孫鍾元徵君挽之。不可。七日而死。天下稱之曰。彭餓夫。云。於時其侄山人名通者。亦與上谷張秉曜結北邙社。秉曜云。浩然歸去事如何。山人云。不向邯鄲惹睡魔。秉曜云。生死總同秋色老。山人云。北邙山畔月明多。已而笑曰。生與死亦何分哉。乃放曠行歌。而一混於酒。好學書及畫。時絕炊。妻子嗷嗷。尙據案揮毫不輟。已而竟起出門去。妻子亦不知何往也。嘗遊京洛。貴顯家皆愛禮之。醉輒作狂語曰。許大長安。何寂寂也。有衣以錦衣者。晝衣夜被。其妻曰。盍珍之。山人昂首曰。汝欲使此衣役我耶。見人輒笑傲。或與人語。至半。輒一笑而止。人延之。必爲置酒。半酣。輒歌呼鳴嗚。不自休。無酒。則攢眉而去。每高吟云。終日萬吞吐。不道一俗字。年八十餘。飲酒浩歌如故。而書畫益進。李堪曰。餓夫之死不悔。而山人復以放曠高簡遨遊人間。何吾蠡彭氏之多奇也。然山人吐棄世故。至妻子凍餒亦不以爲意。其殆爲莊列之學者耶。雖然。世之患得之而患失之。卑躬汙節而不之恤者。其視山人不啻雲泥矣。

郭孝婦傳

孝婦開封郭鍾琇妻。而王指揮堯臣女也。明崇禎閒。闖賊李自成兩攻開封。不克。總兵陳永福子射其一目眇。大恨。於十五年四月。率衆燬四郊麥。百計攻城。城中乏食。推官黃澍括民粟三次。麪一觔直銀二十兩。

繆瑤草小紅蟲瓦松蜚蠊每觔至三緡人相食。孝婦家計口日熟麪水一盃。繼以糠覈。庭前蒲萄啗其葉。盡姑年七十餘。不能食。孝婦懷有乳嬰。適以哺姑。如是數月。爛日減。嬰餓損。呱呱泣。孝婦撫之亦泣。接頤也。而強笑語上堂。乳其姑。九月十七日。賊灌黃河入城。家衆號。巢水上。食絕。漙涓滴僅奉姑。嬰竟瘵。已而水益漲。伴高福得一小桴。鍾琇扶母上。命孝婦面雍樹長兒圻隨。而身與弟別出。桴漂巨浪中。隨波湧。竟達涘。四顧皆賊壘。無所之。有絳衣老父須髯垂曳杖來曰。而郭氏妻孥耶。焉知路。可隨吾行。抵河干。不見一賊。引入草舍。甚潔。曰。此有粥。食之。又曰。吾引而渡河相聚。命登一舟。姑勞坐而氣絕。孝婦擗胸泣曰。天乎。吾願貧年活姑。以乳哺姑。口夜半甦。曰。渴欲沸水。孝婦曰。此舟中也。安得沸水。仍以乳哺之。翌日。抵河北岸。絳衣老父已先候。無何遙指鍾琇曰。而家主至矣。遂不見。鍾琇故孝友。嘗推產與弟。鄉稱曰德育先生。子圻。績學有聲。生數孫。一女孫嫁余氏。不數年。嫠居守節。養其姑。與孝婦後先輝映云。

李塏曰。昔人傳郭巨以子分甘旨。將瘞之。闕得金。乃全。鄧攸避亂。繫子於樹去。而保其侄。皆出好事口。不足信。信有之。斷父母之續體。以爲孝友。烏在其爲孝友哉。若孝婦者。其心皆不忍。而勢難兩全也。斯足悲矣。鬼神相之。有以哉。獨憾明季士大夫無學術。噂沓聲戰。以啓寇亂。使仁人孝婦。不得并保其母子。謂之何耶。

李氏傳

李氏。邠州生員作梅次女也。大父珍。中崇禎己卯舉人。終身不仕。氏少婉孌。十六歲。歸蠡閭生鍵。祖舅際

秦以義俠豪華起家。舅民部出身名進士。氏獨承以儉素。從吏夫讀書節飲。比賢知聞。舅宦俸入不給。謂夫曰。吾家兄弟參然。而令老親貧瘁京邸。非孝也。出簪珥數十金佐供。乙酉年三十六病卒。予嘗歎君臣父子夫婦昆弟朋友五倫亡其四。惟夫婦倫存。閨壺多深情也。又歎五倫存其四。惟夫婦倫亡。牀第匙別也。鍵於予爲及門。來叩神傷曰。氏之賢已矣。願先生傳之也。氏艱於產。力勸鍵置副。自初昏琴瑟甚和。然寡言笑。相敬如賓。鍵偶動慾念。輒正詞止之曰。非求嗣胡爲者。且獨不計君身孱也。嗟乎。古所稱情摯有別者。殆氏與。乃爲傳。

魏烈婦傳

烈婦王氏。新城王五公先生之孫女。而忻州知州新安魏公達陸之長孫婦也。年十五六。父曙光許歸魏氏。事舅韞石姑田氏盡婦道。夫克儉病弱。相之敬而順。康熙三十二年。克儉補易州諸生。嘗讀書保定府城內。時病旋劇。烈婦聞之。自易州坎下倉皇入侍。左右奉養。卒不起。烈婦擗踊長號曰。吾無天矣。可生耶。吞毒半下咽。姑見以指出之。大哭呼曰。吾與汝舅俱有年。汝夫之二弟稚。汝夫死。汝又死。是死吾夫婦也。灌以藥。日夜令人防。且曰。若叔後日產子。首卽與汝。烈婦時年十九矣。乃強理生計。茹荼攻蓼。不少懈。數年後。季子克肅生子繼先。遂以嗣之。烈婦撫育甚摯。鬻鬢督就外傳。隨兩叔父學。夜歸。必令背誦。初。克儉藁葬坎下村側。至康熙四十八年。韞石立新阡營葬。烈婦同穴之志。怛怛動。淚集裳不可拭。已而佯爲歡笑。時韞石率二子入府試。烈婦撫繼先曰。汝祖及叔父出。祖母室無人。兒可伴祖母寢。繼先怙恃久。牽裾

不去也。及夜夙興。視兒寢熟。乃饋漱櫛。以手畫壁曰。吾事畢矣。志遂矣。端坐几上。雉經而卒。王五公先生與魏公達陸。皆容城孫徵君門人。徵君當明季周旋左光斗。魏大中。周順昌。逆璫之難。幾濱禍。不懼。故其講學以氣節入。而五公先生更淬礪氣節。抱膝著居諸編。倚天長號慷慨。須眉如戟。達陸亦仔肩徵君之事。垂老不悔。宜其家婦女之仗節視死如歸也。安肅知縣薛祖順旌其閭。爲文立石墓畔。一時歌賦輓贊者無算。

李塋曰。吾友惲皋聞每爲我言。人性有四德。而今最亟者在羞惡。能起人羞惡之心。人紀烝烝日上矣。嗟乎。誠哉是言也。如烈婦殆激發於羞惡者素耶。其視人之朝秦暮楚。面作心不可須臾活。而烏得不終以死殉也。婦父家姑。五公以字易州田治挺之子誠甫。事夫如大賓。誠甫夜出至漏二三下。必秉燭莊坐待之。無惰容。誠甫亦早逝。撫一啞子育孫成家室。今蕭蕭白髮七十餘矣。與烈婦生死皆無負云。

王子傳

王子名源。字崑繩。大興人。父世德。明季以世職官錦衣衛指揮僉事。國變。避地高郵。著崇禎遺錄。子二。長潔。王子其次也。性剛而好學。少從梁公以樟遊。樟。清苑人。明己卯北直解元。後亦如南高隱。與王子兄。潔共談宋儒學。王子方髻。聞之。不首肯。獨嗜兵法。爲古文。魏禧見而奇之。曰。此諸葛君之流也。著兵論三十二篇。謂古文規撫先秦西漢。以離以斷爲章法。宋人株守韓愈。文從字順。語求合求續。惟恐顛躓。而古文卑茶衰亡矣。三藩平後。競尚筆墨文學。館閣徐乾學等招致天下名士。排續詞章。一時如劉繼莊。以及

萬斯同胡渭生閻若璩輩皆集闕下而王子亦與焉顧睥睨儕伍蔑如也聞予相與晤予微言聖學王子目瞪神懼持予大學辨業去是之因與劇言顏先生明親之道令閱存學編夜同榻臥雞鳴蹴予覺起立曰吾知所歸矣吾自負有用古文必傳世然躬際太平弢鈴安事文辭終屬枝葉非所以安身立命也倩君价予執贄習齋遂入博野傳顏先生學時康熙癸未王子年五十六矣初王子自命英雄夜定必置酒痛飲面昂身挺目電須臾議論磅礴今古醉則歷罵貴顯時流雜以諧謔壻徐語曰子誤矣吾人當與堯舜周孔衡長短乃卑之較論時輩耶王子大悔立省身錄效習齋日記以考糾身心得失晚年學益進嘗吳三桂畔天下震動王子笑曰無事也三桂鼓行而前直抵中原策之上也順流東下以取金陵跨江而守策之中也裴徊荆襄延日引月此成禽耳駕馬戀棧安知遠圖必無事矣已果如其言及聞顏先生學乃著平書十卷一曰分民謂士農工商以分之甲保鄉以合之立鄉官曰正曰叡曰巡以治之而奸民游食異端則變之除之也二曰分土謂郡縣久任重權如封建縣統於府府統於藩其地域則因山川隨輻輳不相紊不大懸也三曰建官謂內官設府公孤端揆御史成均也設部農禮兵刑等六部也設院通政黃門也設衛金吾羽林也設司曆象醫卜之類也外官則藩府縣縣有堂縣令縣師也有衙六衙也有監亦醫卜之類也府藩皆如之而異其名其銓選則以一途爲陞降不以他途雜之如縣令轉至相國而其官止縣師轉至大司城而其官止縣衙理農者轉至大司農而其官止縣醫官轉至京師醫官而其官止之類也別其賢否爲舉錯不以年勞限之天子考相國相國考卿貳以及州藩下則各考其屬外巡按御

史勅之內御史府黃門院勅之三年一考九年三考或陟或留或黜而又有不時舉勅者不論年勞也四曰取士八歲入鄉學教之孝弟幼儀識字習數讀經書習小樂舞十五入縣學教之六德六行六藝閱史陳策二十後教成者進之郡學教之三月試之又進之藩學如之進之成均如之遣歸縣謂之太學生分科以爲士曰禮儀曰樂律曰天文曰農政曰兵法曰刑罰曰藝能曰理財曰策科分之各署三年明習厥事乃實授之職曰下士予祿官以此爲始五曰制田議均田開水利也六曰武備兵制兵法也七曰財用論積粟錢法鹽法商稅也八曰河淮治水也九曰刑罰謂復墨以罪賊復劓以罪盜復宮以罪姦也十曰禮樂移風易俗也而最要者尤在建官取士二則所謂爲萬世開太平者也初王子數歲從父於南迄壬申父八十思首邱適天津鹽商張霖豪俠好士延之遂奉父居天津中北直癸酉科舉人父卒葬之京師西山祖兆經理松楸穴場數年淮安姚守聘遂謝己丑春闈攜家而南時閱子易經傳注知太極先天諸圖皆道家異說與聖經牴牾乃於淮署著學易通言五卷抵庚寅遂卒於淮署一子兆符辛丑進士自孔孟沒而聖道失傳陵夷漢唐至宋明而歧途互出佛老俗學浸淫雜亂顏先生崛起樹周孔正學躬行善誘志意甚偉而傳聞不出里閭王子來學漸播海內如吳涵萬斯同王復禮郭金城方苞謝野臣陶窳惲鶴生以名宦聞人傳布其說而道日益著

李塏曰王子所謂豪傑之士者非耶迹其文名遠噪公卿皆握手願交意氣無前且半百耆儒弟子請業者滿戶外乃一聞聖道遂躬造一甕牖繩樞潛修無聞之士偃僂北面惟恐不及非誠以聖賢爲志其能

然乎。當在時相與切磨。更欲進以沈退純粹。乃及今思之。寒丰正采。氣薄霄漢。尙有斯人哉。尙有斯人哉。黃弼臣曰。崑繩夫子。己丑南行。飲予齋。留詩云。憂向中來豈易寬。與君對酌且爲歡。憐才自古英雄少。得意當前我輩難。消遣壯懷談寶劍。蹉跎春夢付征鞍。還期共醉金臺下。四野蕭蕭放眼看。聽其語甚悲。而不知遂爲詩懺也。讀傳如見須臾。爲之潸然。

萬季野小傳

萬季野諱斯同。鄞人。父兄以文學世家。季野讀書。過目輒不忘。尤熟廿一史及明代典故。徐尙書乾學聘入京修明史。已乾學去位。王尙書鴻緒主之續修。當是時。朝廷平三藩後。尙辭學。公卿從風靡。讀書名士競會都門。而季野以博淹彊記爲之首開講會。皆顯官主供張。翰林部郎處士率四五十人環坐聽。季野講宮闕地理倉庫河渠水利選舉政刑諸項。不繙書。每會講一事。口如瓶注。溫睿臨札記。何代何地何人年月日事起訖。豪釐不失也。時吳都憲涵楊予論學。季野暴聞予名。又知予與毛河右遊。先是萬氏叔季在史館纂修。爲河右所折。嘆之。金德純特筵招胡朏明。季野及予曰。三君者。天下巨君也。予後至。季野酒餘赫然曰。河右全集序爲先生撰。稱許太過。將累先生。予謝手曰。敢拜直言。然序文先生未深讀也。序以躬行自勵。以讀書歸毛先生。方慙虛大。非以屈諛。且聖道恢郭。詎一說而已。胡子曰然。因罷去。旣而謂予曰。先儒訓學錯出。愚謂祇是讀書耳。予不答。但叩其長。歲辛巳。都憲及徐少宰秉義謀梓予大學辨業。予思季野負重名。見不合。或詆譌。不如先事質之。袖往求正。踰數日。季野見下拜曰。吾自誤六十餘年矣。吾

少從遊黃梨洲。聞四明有潘先生者。曰朱子道。陸子禪。怪之。往詰其說。有據。同學因轟言予畔黃先生。先生亦怒。予謝曰。請以往不談學。專窮經史。遂忽忽至今。不謂先生示我正途也。自此情好日密。一日講會衆拈郊社。季野曰。未也。請先講李先生學。因舉辨業所論格物卽學六藝。歷歷指示。曰李先生續周孔絕學。非我所及。諸君有志勿自外。並延予登坐講郊社。予辭謝去。嗟乎。吳越文人爭尙浮誇。季野耆宿。褒然厭於上。公卿趨其餘風。今忽聞野人一言。傾心折服。舍己从之。是一端也。幾於大舜矣。時季野修明史。紀傳成。尙缺表志。無助者。與予雜論經史聲韻。曰夾室並廟室皆南向。故顧命西夾南向。敷席。晉立古文尙書。不可廢。予曰。夾室東西向。非南向。爾雅稱東西廂是也。公食大夫禮。宰東夾北西面。使並廟而向南。宰何爲立廟後乎。立廟後。何以至東序授醯醬薦豆乎。古文尙書自漢孔安國送官府。至晉中祕尙存。惟無傳。東晉梅賾始得安國傳奏之。非獻古文尙書也。曰何見。曰見隋書。予又曰。古无四聲。有之始齊周顒。古惟分宮商五鈞。不分平入四類。季野憮然曰。吾何以未考也。歸檢之。信。攜手曰。天下惟君與下走耳。閩百詩。洪去蕪。未爲多也。從臾王尙書來拜。意招予同修明史。予辭謝不願也。無何季野卒。予亦不往尙書家。事遂寢。

吳姬傳

姬。封邱吳氏女也。幼孤。爲人略賣北里。迫之倡。誓以死。不從。後其兄知贖歸。鄆城李長華遊封邱。聞之。遂聘爲下妻。奇愛焉。長華以入貲。需選縣令。寓燕京。姬從操井臼八年。甚力。甲申春。長華病逝。姬孺子呼曰。

吾主。吾願與主同死。孫檢討勸本李姓。夙與長華通。兄弟好。往弔。聞其哭。曰。噯。是異常聲。爲具棺殮。姬睨之曰。左。度右側。可再容一棺。乃止。翌日。遂飲煇。檢討馳救之。曰。而毋死。而主君死。而又死。他日君之子來。疑問臧獲。其何對。且而護喪。以俟君之子來而致之。而事乃畢也。姬曰。然。遂不死。十餘日。長華次子至。知其事。曰。而何爲死。倚我歸葬。吾且以子與而爲孫。以酬而勞。檢討佐之曰。是可以不死。姬泣無言。夜半竟經死。

李壻曰。賢矣哉。姬之死也。含笑相從地下。又何言。獨念檢討君以貧官。其交遊如長華者亦多有。然長分米給炊。比卒。典朝衣爲之具。姬死。又具轡葬之真空寺側。去廣甯門十里而近。西瞰西山。東帶普濟橋水。二松謾謾其上。明人詩所稱真空寺後雙松樹是也。檢討急友朋。篤重節義。吾願爲執鞭矣。

郭令小傳

郭令子堅。名金湯。京師人也。其弟子固識予於稠人。子堅亦篤信焉。予與二人少長各一歲。參列若兄弟。然子堅性質直。不侵爲然諾。好潔。勤細務。井井出知桐鄉縣事。延予至。愛禮之甚厚。已歸。又延至。憂予將四十。妻無子。重聘爲予置副。構留春樓以居。予生子彌月。奏樂設筵。乃載旋里。蒞官明於讞決。抑豪強。擊猾吏。嘗與予並轡出勸農桑。赴薦紳席。不以官自異也。予遊西湖訪師友。遣役齋斧資恣所之。有過問學者。飭廚傳惟恐後。丁祖母艱。解任。年四十八。遂卒。嗟乎。迴想生平情義之交。未有如之者也。其內子四川巡撫于養志女。敦潔閒雅。歲時以邱嫂禮相見。拜讓中節。凝如也。與子堅相敬如賓。御下無妒。予初往。

桐比返。僅六七月。子堅爲我製錦緞褙。絮著皮裘。以及相服。倒頓柏腹之屬。除不算者六十餘稱。皆子夫人手自縫紉。及予有副。子堅戒閹曰。李先生室所用布帛果資鍼縷諸物。有呼卽應。勿關我。當未往桐時。子固軫念予後。先爲我家中置一副。予嘗語諸子曰。而世世無忘郭氏二公也。

郭御史傳

郭御史名金城。字子固。父盡忠。仕至吏部文選司主事。早逝。盡忠養父顯名。撫御史甚嚴。遂自奮以學問。宦績著於時。由旗官學生試特等。授內閣中書。陞刑部員外郎。轉御史。先是御史好詩文。聞予言。顏習齋先生學盡棄之。講求天文地理。刑書數射。御諸學。入刑曹。精練刑名。十四司稿皆倚定。每決讞。再四欷歔。全活甚衆。及官御史。曰。吏治不修。由官繁亂。人才不振。由三代學校選舉之法不復。因先疏請汰冗員。行之。而時逐宦利。謂仕途減則阻滯。羣怨謗御史。笑而不辯也。御史貌謙謹。見人翬翬如子弟。而中實不可一世。非其道義所欲爲。百方撻之。不動也。杜絕暮夜苞苴。親串僕從。從吏終不變。公退。則閉門不請謁。人一日遇尙書甲於塗。曰。君何不一謁。曰。公有公地。私無事。何由謁。曰。時如此。勿執。曰。時如此。而某人如此人也。甲嘿然。當御史十三四歲。顯名。使京西廐山牧馬。且牧且刈芻。暮束芻馬上。跨而歸。艱苦備嘗。嘗歎曰。吾命貧。安之。且天子艱。奈何。力爲善。卒不盡其用。四十一歲卒。三子。卒之日。囊錢不足百。敝衣布襪以歛。

李塏曰。御史篤孝弟。能取師友。頗嗜黃老。謂予曰。先生惡惡嚴。傷和。予曰。怒哀中節亦曰和。黃老玩世。窺

爲酷烈。非和也。蒔花木。適適然。曰。藉以存吾心也。予曰。寄心花木。無花木。心安寄。改容稱是。嗟乎。共學可深言惜哉。

王孫裔小傳

王孫裔。陝西涇化人。居西安府。性慷慨。以畫名。寫山川人物如生。歷歲月始一幅。巨富貴迫之。不得也。聞人畫宗某家。則軒渠曰。畫必有物。肖物足矣。焉知某家哉。畫天如天。畫地如地。畫何山如何山。何人物如何人物。今日做荆做董。古人卽善寫。而做不必善。迨數做而盡失之矣。初畫山水。或曰。人物渠則未也。遂寫人物。或曰。渠善畫。未能書。適有懸紗燈書蘇字。臨之。卽酷肖。曰。一能則俱能。能山水不能人物。其山水亦非也。畫華嶽也。必先策杖窮三峯諸形勢。無一笔雜入泰岱恆衡者。性愛鴨。畜之。以次飼。鴨序進。莫敢躡。察鴨性情神氣。目睛及毛澤。每節氣皆有變。畫如之。栩栩欲活。予乙丑遊秦中。韓武。張中。陳尙孚。魯登闕。黎宋濬。皆來從遊。問顏習齋四存編。而孫裔亦與焉。慨任爲我寫照。延至其家。設筵令予坐。目注身嚮。終日不易。曰。動則與初摹者駁矣。摹面就。河南善畫人周璵亦遊秦。共視。撫掌曰。肖。孫裔曰。未也。毀之。數日又設筵招予寫。已而何將軍萬鍾等皆代爲肆筵招寫。每一圖出。人愈驚歎。曰。猶未也。十易稿乃定。已補冠服及從者。琴劍樹石。逾年乃竣。秦省尙武。善騎射。孫裔以意氣雄桀踞其上。幼結一有力者鬪力。一日二人皆醉。孫裔起持之。有力者曰。醉不檢。恐傷也。孫裔不可。有力者儻以靴折其脛。脛斷。乃尋人接骨。藩司甲聞之。遣善醫視。曰。接錯矣。將終身廢。孫裔曰。如何。曰。須再折再接。如之何。孫裔曰。易耳。以股入門。

闕下張之。驕然折矣。神色不變。醫傳藥脛。痊如舊。家貧。雅好周急。凡戚友乏者。暨四方旅客無資。日按名給若干爲常。人號貧孟嘗君。糧道旗乙延爲上客。因識其僕丙。後丙逃之。孫裔所。糧道覺。謂曰。若匿吾僕乎。盍出之。曰。公何不早言。吾已諾之矣。可使吾食言乎。卒不出。每夜必操鎗百合乃寢。貌潔美。而雄赳之氣溢出。或曰。予照從者。卽其自照云。妻某氏。以孫裔未有子。勸置筵。孫裔遲之。妻曰。以我耶。遂爲尼。別居不之見。而有賓至供饌如故也。孫裔東去。遠左。妻尋卒。有人西來。言其畫。尋者數百金。不可得。

馮劉二翁合傳

馮翁翼。公名廷獻。清苑人也。少未讀書。而有至行。孝友。知守身。一婦人挑之。故與戲。翁若不聞。夜啓戶延避而去。年邁。猶夙興日灑掃庭除。令無點塵。夷然稱其心焉。教子辰。耨禮義。從子遊。卒。年七十八。於時劉發璋之父亦七十餘而卒。子皆哭而弔之。劉翁吾蠡。人名起聲。字宰宇。亦未讀書。短小長髯。才幹有口。晚年產落。浩歌拾薪。無慍色。慕顏習齋先生學行。恨老矣。不能從遊。使子璋向予授讀。當壯時。尙義俠。排難解紛。親友有急。能飲助。嘗應里保長。永清一點役。挾翁一里人。爲盜者來緝。盜投文。蠡令趙下里。氣轉張甚。陰縱爲盜者逸。逮其族人。縲而拷之。翁爲解役。曰。汝解渠。孰爲汝解。翁曰。汝誰何。役曰。將拷汝。翁曰。拷則殺汝。役曰。明明日月。朗朗乾坤。而敢殺人。翁曰。明明日月。朗朗乾坤。而敢拷人。鳴炮紮鄉兵。縛而暴諸日役。曰。何時殺翁。翁曰。尙有須。卜夜耳。及夜半。牽之行。役以爲果殺已也。寤呼。至半塗。解之。鳴於趙令。令具文解巡道。使與翁訟。不勝。責枷。黠役奉頭慙謝去。

李塏曰。馮翁近狷。劉翁近狂。使得聖人以裁之。豈近今之人賢哉。乃卒貧以老。名不出於里閭。悲夫。二子負質亦各肖其父。積學充之以顯其親。豈異事耶。

張太翁傳

太翁諱興家。字旺川。無極張子業書之父也。幼有摯性。好飲助人。考少庭。舉三子。翁爲季。八歲。少庭卒。哀毀若成人。侍母王氏。宛轉得其歡。十八歲。母亦逝。踊號五日不食。服闋。兩兄議析箸。翁隨而泣。不得已。分田二十餘畝。淬礪耕作。至千畝。仲兄同母居相近。事養頗易。孟兄異母也。嫂楊氏居城內。與翁西郭宅遠。服食支費。翁日往爲之營。及卒。皆葬如禮。同祖姊三人。一爲庚辰進士朱君良之母。一適宋。一適何。俱年八十餘。翁時迎養。並及其子姓。垂白婆娑。飴膏聯席。驩如也。有乏周之。而宋尤貧。姊卒。葬如兄。母有前生劉姓子二各一子。貧。喚養之。爲其子昏。生子成產。始遣歸。里黨昏喪不足者。竭力經理。不待其告也。恃以舉火者數十家。一日之田。見盜麥。枉道避之。曰。吾見恐惡難堪也。布商宿其家。夜失數百匹。尋之有跡。翁曰。聲張其人終身廢矣。吾自償之便。金亡。或曰。甲翁曰。渠竄。吾遺之。非盜也。西郭舊有傭市。祿歲無雇者。呼曰。願累三翁。卽數十人飯之。倍其直而去。初。少庭能舉千鈞。人號張大力。明季寇發。少庭率十餘人持挺禦之。莫能前。寇忿甚。千百麋至。攢刃。少庭手揮之。十指斷其八。迺以掌握。由擊一寇目睛出。羣寇環救。少庭逸。然生平不與人競。或戲而圍撻之。弗拒也。已而振臂一搖。衆皆倒。翁亦多力。一婦人投井。救者下梯援。婦人不肯出。衆圍視。莫如何。翁提梯並援者。婦人俱出。而更謹。不爭。卽有怨。亦不校也。極令陳明。

倫甚禮之。每肩輿或乘馬遇於塗，必起而拱。月之吉，鄉役來比，輒戒曰：「而輩歸訓鄉人，務爲善如西郭張翁者。」爲登縣志。卒，年五十八。邑人識與不識，皆流涕。元配朱氏，繼配劉氏。子二，長卽業書。朱出壬午科副榜舉人，教習正紅旗官學，候選知縣。不遠數百里，屢過壙商學，見其篤好友朋，急信義，遇事咄嗟立辦。時邊陲遣役，關東西苦饑，張子需次民社，慨然思一見於經濟。壙謂之經濟，自家始。張子因言教其異母弟景書，每垂泣相視，爲補太學生，始延師。旣而躬教其甥劉沈、李夢龍，從龍養於家，皆入庠。母家侄教養之，爲補吏員。今年壙遭先妣大變，已葬。張子又遠辱弔，已而匍匐歷言太翁事，求傳，乃知張子之孝友，慤恒有自也。壙罪逆之軀，性傷急陋，兼貧窶，粗給衣食，無能嫗睦任卹，獲茲天譴，聞翁父子閒事，滋之愧也。爰如其言，而以不文者誌之，俾爲鑒焉。

龐魏氏傳

龐魏氏，蠡之龐家莊人也。夫龐娶鄰村魏家，曩魏氏女，邑令以賢詳聞上憲，曰：「龐魏氏。」因以稱。氏夫早卒，守節不嫁。而祖姑徐氏、姑董氏皆先守節。三世一堂，氏竭力養之，不使姑與祖姑一匱勤也。勤女工，刻無甯者。織棉布，一日一端，或給之綾爲織，每端必長一二兩。曰：「漿糲所滋也。」與以直，多一錢必壁之。農時躬耨，而不與男子交語。比鄰不過往，祖姑八十餘，目昏，躬負之如廁，向曝，返牀復負入。姑亦耄壽，負出入如之。終葬以禮。族或周以喪具，資氏曰：「吾貧，暫貸用，必償，如不使我償，是視我非人也。」日夜織，不期月皆補完。柩發，披衰負引，或請代。氏曰：「吾二姑无子孫，吾在，卽其子孫也，可代乎？」姑之窆，以夏六月，雨水瀰塗，氏

躬衝水泥。擗踊長號。從觀者皆爲流涕。二女有甥。雍正三年。邑大水。饑。朝廷開倉。令有司賑。邑令喬公查饑民。過其門。見室戶零落。曰。此貧家也。盡告賑。里役曰。寡婦曰。寡婦亦吾民也。若饑則與之。里役戶外呼之。告以故。氏曰。氏固乏炊。然問食朝廷米。償不役。以白喬公。曰。賑也何償。役復之。氏曰。償則食。不償。吾孀婦耳。何功以報朝廷。而徒食乎。不可。鍵其戶。再呼之。不應。喬公歎息而去。大學士高安朱公一女孀守其舅姑。不願也。女茹苦澁淡。卒不渝。公一日使人視之。與以金爲養。女曰。吾待亡旦夕。有何支費。而以金爲。且吾公素矢廉。此何自得之。卻之歸。與氏判貴賤。而高義南北輝映云。喬公具刺拜氏。歸之米一石。令邑東鄙郵而致。氏又辭不受。來役力請曰。邑父母養汝節。可拒乎。氏不得已。奉刺及米置於案。拜而受。上憲聞。皆賢之。謀旌表其閭。其族黨公選近族賢者爲嗣。以世其家。

恕谷病叟曰。鄙性迂。从不敢居間當事。爲潤澤。出遊四方。卽少同筆硯者在宦。亦不敢行李過。而問斧資也。而天下穰穰利往。熙熙利來。相視駭哈。甚者陰持無何有之事。以相詬厲。每自疑吾道非耶。何爲至於斯。今乃得龐魏氏。朝廷行仁。匹婦守義。而仁不能加之。異哉。居不遠。過而求誨。必有以開予。而惜其爲婦人。且嫠也。何以爲之。執鞭一欣慕乎。惲皋聞曰。孔門訓仁。孟子尤重義。以廉恥可以持世也。氏與高安朱氏皆以婦人而重廉恥。吁。可歎哉。

恕谷後集卷七

內邱縣儒學教諭李君墓志銘

李君諱樹碩字簡臣以選拔貢生康熙四十八年選內邱縣教諭君不自閒其官脩學宮自其邑安平置文廟祭器百餘事齋至內邑課諸生以文行暇則與之賦詩道志由是人文丕變會五十年奉旨蠲幾輔民糧乃內邱令以比歲不登多逋賦催科加亟日敲朴民鼎沸相率運坏木砌縣衙門令倉皇无措君聞急往視諭以上下大義民乃解適分巡大名道甲過內邱民聚馬首呼冤令懼私勾甲執呼冤者繫之獄且謂必有衿生唆之竄數名呈甲甲呼君讓以不能束士君惘然正色曰民填溝壑而號呼誰能禁之而安事唆之諸生何尤且碩不能束士罪也願投簪甲爲之霽威置諸生不問而去至柏鄉使人召君意情之爲邑令調停也君揖使者曰吾老矣乞休矣不長於奔走無以奉命遂告休次年夏旋里將行之夕忽聞門外大呼且哭君驚起偵之則成碑人焚香叩送者及出郭士民攜觴泣別蠡擁馬前不得行予嘗謂官人要職惟冢宰與縣師冢宰在上位進退人才者也縣師在下位教育人才者也而今最閒無事亦惟此二職冢宰不復問選人賢否惟立簿列年分先後爲用次縣師懽懽閒坐終歲不一教士比文衡案臨造冊齎送如此則置書吏辦之皆可報稱奚事贅官乃君獨改轍造士且復留心民瘼其不合而歸宜也君先世以文行相禮游歷仕途君守身孝養爲邑人捍災患一遵先人旨躬訓諸子俱積學康熙癸巳科

或謂曰。諸公子文張甚而屢躓。皆謄錄人潦草誤之也。近有賄謄錄者。盡效之。君曰。不可。是以賄進也。既是科謄錄賄發。而子用含入穀。君諭諸子曰。履正不亦獲耶。僥倖常有濟耶。鑒之。率祖攸行。無忘於戲。君之守正素矣。配某子五人。用晦。用弢。用含。用煦。用弘。女五人。孫七人。享年七十有二。將塋也。晦衰絰。匍匐求銘。銘曰。

職之任。時之宜。不周而去。奚其悲。呼池之旁。君子之藏。白楊風起。苟無戕兮。

原任戶部郎中閻公易菴墓志銘

予年才半百。而四海舊遊零落過半。乃同里閭友如閻公者。亦委形速化矣。能無恫諸。公諱中寬。字公度。易菴。其號也。世爲吾蠡新興里人。少聰穎異常兒。十二歲補博士弟子。康熙乙卯科。韓公棻主試。中舉人。己未。成進士。隨授行人司行人。先是公父大來翁。以義俠名聞天下。公復嬪以文學。家聲蔚起。而公乃化。倜儻爲寬厚。易見事風生。以退謹。矧矧然侍尊長後。嘗移時弗出一詞也。大學士王公熙愛其新進有聲。欲子畜之。公曰。可謂他人父耶。謝不應。或從臾謁大學士索公額圖。公曰。吾拙澁不嫻走趨。不往。已丁母艱歸。益潛心書史。聞王五公先生多學。安車迎之。事以師禮。吟咏披繙。遂益富。補官。與淮安李學士鎧。大名袁翰林佑。山東蘇中翰偉。任丘龐翰林塏。宛平陳處士干王。結詩社。著述成帙。博陵顏習齋先生。崛起倡周孔正學。以九容齊明表裏。並進治身心。謂六德六行皆從六藝入。以禮樂射御書數爲學。塏時萍踪入都。傳其說。公力是之。因與倡明學術者。如許侍郎三禮。吳都憲涵。王孝廉源。翰林竇克勤。冉覲祖。俱往。

還而正學亦駸駸有聞矣。顧公恬於仕進。以行人使江西。題詩滕王閣。忼慨拓落而返。已轉刑部主事。又轉員外郎。晉戶部郎中。皆未究其用。丙戌春。闈被劾。彈黜者咸無恙。公分房杜絕請謁。乃以殿試一卷。不如式鑄職。及旋里。老病糾纏。遂以不起。悲夫。公生於明崇禎十三年五月二十日。卒於康熙四十九年二月七日。得年七十有二。父母以公貴。贈奉直大夫太宜人。元配張氏。贈宜人。出一女。副室晉氏。出長子鍵。廩膳生員。繼配蔣氏。封宜人。出子鏞。增廣生員。入國子監。又出銓。增廣生員。蔣宜人又出二女。孫七人。於其卒歲也。將葬里東之祖阡。求銘於予。予少年厲角戴。鋌立欲馳驅。寓內及見公醇醇恭謹。積學彊識。而不知名譽爲何物。爲之退然自歛。又典故有遺忘者。詢公。輒歷歷指其巔末。而學有助。乃今俱不可復也。烏忍不銘。銘曰。

余德之儉。余學之涼。時鑿壁鄰。借照其行。迺公長於古。短於今。以不沛其霑。而佳城是函。吁嗟乎。醇醪大樽。問十得五。奕禩窺此。尙款起起。

趙室蔣孺人墓志銘

永平府府學教授趙君晉升之妻蔣孺人。以康熙四十四年十月卒於官署。其子扶柩歸滿城。抵四十六年冬。厝之先原。句志銘於予。言孺人十七歲歸趙君。善事舅姑。撫前室六歲子。灑如己出。相夫勤儉。教諸子成名。有節度。今儵眴以逝。予聞之。不覺淚涔涔下。作而歎曰。孺人之所自來。何可沒也。蓋忠孝節義之感人甚矣哉。孺人者。吾蠡崇禎戊辰進士戶部山西司郎中蔣公範化孫女。而庠生爾恂之女也。戊寅。範

化家居守蠡城。死於兵。爾恂抱父屍大慟。已而畫父像。已帶劍立其側。朝夕哭拜。必祝曰。父无恫。兒必尋父讎報之。後偵知殺父者爲某汛卒。丁亥。紮衆入蠡城。捕汛卒磔而祭其父。東走河間。衆潰遁去。當是時。爾恂方二十三歲。娶孺人母李氏。爲高陽李文敏公族女。祖父皆科甲顯宦。而少婉嫕。成童。執巾櫛。羞澀恭謹。不敢仰視。爾恂方蓄力學。技擊氣嶽嶽。忼慨有爲。於妻子未嘗一狎視也。丁亥二月。遂電掣雷馳。天涯生死永隔。踰一月。李氏產孺人。去于歸不及一週也。嘗撫孺人泣曰。汝父丈夫也。吾人追憶汝父面目。皆恍惚不可省識。第而父執大義。吾當執節報而父。閉戶紡績。以給饘粥。今年垂八十。白髮蕭蕭。惟撫此女。猶毅然時訓以婦道。不作兒女態。而今孺人且復先母逝矣。嗚呼。其可悲也。孺人享年五十九歲。子三。長卽灝。前室劉氏出。乙丑進士。原任弋陽縣知縣。娶某氏。仲漪。孺人出貢生。娶某氏。季溶。孺人出庠生。娶某氏。女幾孫幾。嗟乎。孺人烏可不銘。銘曰。

距躍叶闌。不周東仆。陽窮陰燦。支機毓玉。漣波蛻醴。襟裾滄渤。赤羽白練。割雲銑鏐。剌胸酌酒。九原笑作。黃塵萬里。安知衿櫛。歎茲嫠曜。呱呱泣血。持踵吾息。百年冰雪。瑩瑩沆瀣。母女嬾轍。井臼積勞。膝前告訣。攢劍束鏑。郎峯削男。葡萄延來。如覩鳴鏑。嗟竊其中。鶴髮淒洌。奕禩忠孝。眎此銘揭。

安平崔君聞遠墓志銘

世稱世家。必曰江東王謝。河北崔盧。崔著土爲博陵安平。自漢以迄唐季。簪纓閥閱。蟬聯鵲起。其後少衰。淩播越矣。抵前明。而安平之崔氏復著。今康熙五十三年。嘉平崔子楮來求其尊人墓志。予幼卽聞安平

有崔文學亮遠者與祁陽刁文孝先生講學兼以餘力治岐黃術聲施遠邇崔子之父則其次弟也按狀諱甲鎰號聞遠亦講學杜門埽軌課子弟誅茅三閭蒔花木畜金銀魚數尾曳杖頽仰曠如也子弟或事詩賦輒付火曰勿啓囂張業農商者必戒以勿苟得率內子事父仲藏公孝內子同邑劉翁思明女仲藏公飲食必以內子羹他人代之仲藏公咽不甘也母蘇得沈疴君晝夜侍湯液抑搔十餘年如一日繼母宋病瀉三載廁牕衾衣污穢必內子親滌晚年爲名山遊至五臺遇虎同行者震伏虎目君踰巡而去人以爲孝感仲藏公病彌留曰吾舊家也歷傳有銅鳴蟬古銅鎖瑪腦枕賚劉婦醅爾孝初明永樂間遷大甯衛小興州人於內地或曰小興州崔卽安平之崔所播遷也始祖文明徙河南中牟曰非吾故也改北轅籍安平城西之黃風里遞傳七世祖崗山西岢嵐州學正六世祖文進陝西保安縣知縣五世祖俊山西絳縣主簿已挂冠歸授生徒崔族科第蕃衍率出其門高祖承祀嘉靖辛卯科舉人曾祖璵萬曆乙卯科經魁任河南淇縣知縣再調湖廣竹溪祖向學萬曆戊子科舉人江南寶應縣知縣父昂卽仲藏公也國子監監生博學彊識李自成陷京師各州縣俱署僞官同兄山海關遊擊晟弟附監生昂屬僞官謀起義旅僞官鉤鉅盜斃晟昂仲藏公跳身走及興朝定鼎聞其義召以官仲藏公慟兄弟偕亡辭不就故崔君仰體父志與兄亮遠弟穎涵分甘連裾讀書共樂至語以帖括舉子業掉頭不屑也子四人長均武庠生次壩庠生次墩次卽壻庠生女一孫四人曾孫二人崔君卒於康熙四十一年十二月距生享年六十九歲已葬其里之祖兆矣抵今年六月配劉氏卒得年八十二將合壙乃爲之銘銘曰

是惟公侯之後。必復其始。博陵馬鬣。熊熊燭天。不在貌公禮侯。而在剗跡埋名之崔仲氏。

委攝四川仁壽峽江兩縣知縣陳君墓志銘

予以康熙辛巳入都。持周孔三物四教之學告人。吳石門公爲予梓大學辨業。一時傳爲創論。凡海內有聲士。無不過從者。富平陳子四如。其一也。陳子豪於詩酒。每飲白輒慷慨欲有所建。豎於世。甲申。溫子德裕令郾城。力延予衍學論政。時其幕中乏人。予因薦陳子同往。次歲。予辭去。而陳子亦旋偕廣西巡撫梁公而南。己丑夏。富平楊令三促予榻其署。歲暮去。今年二月。迫延復西。秋。仲正趣裝東返。而陳子適自粵西抵里來晤。別已六年。入門。匍匐曰。如。兩間罪人也。先君敦氣節。經濟康熙十八年。從勇略將軍趙良棟征吳三桂。復四川。積功題委成都府仁壽縣知縣。又以會兵進滇黔。倚先君才。料理軍需。委受嘉定州峽江縣。及將軍保題部授再三。疏末下。而先君於康熙二十年八月卒矣。不肖飄零南北。藁葬哀鳴。今歸。將謀禮厝。願以志累吾子。嗟乎。昔李廣能衝陷折關。漢文帝嘆曰。惜乎。子不遇時。如令子際高祖世。萬戶侯豈足道哉。陳君當三藩叛亂。可以叱咤風雲。立建偉績。而僅偃蹇委理縣務。贊志而折。矧今中外安枕。剗高塞深。而欲於人簿書期會之餘。行其迂古政學者。何也。陳君諱正試。號公庵。得年三十七歲。元配陳氏。生一子。卽四如。繼配張氏。生子四表。將以某年月墓某原。爲之銘。

銘曰。才則儲。時則須。乃良行。跛不舒。矧無痛呻而進火齊。哇哇其吐。

劉君來獻墓志銘

雍正二年閏四月安平劉君來獻以七十歲卒抵秋杪其子廷傑匍匐階下求填墓之文予悲焉君世系詳予前撰劉氏家譜序及諸墓表內君生而醇龐爲諸生有聲能承二人意父化吾翁病事之數月衣不褻帶母馬太君年邁畏暑躬負之陰一日數移抑搔痛癢無倦色弟及姊生死爲之謀自用儉而尙施與隆禮師友持家不許僧尼往來男子不許晝處內婦女無故不踰柵教子姪基以小學夜訓女口授女經見人非禮至垂泣誨焉立家訓如戒賭博急輸將等二十二則以顏習齋先生教禮樂射御書數命傑文武兼習學院陳公世倌取其武補庠生予念堯舜湯文傳道於上尙已孔子始傳道於下得其傳者惟顏淵而早卒文學躬行僅餘分統孟子弟子則無所傳今習齋先生崛起而復周孔正學一時過從者多有劉君僅於會過一識面而其後心竊私淑謂學莫先於禮禮莫重於祭倣習齋置齋戒牌虔供春秋立祠堂修家譜樹墓碑又二八月上辛從祀習齋亦得先生之一體者不幸承乏如堪號呼天下已半生而或興於前墮於後明之從暗之移屈子曰蘭芷變而不芳兮荃蕙化而爲茅王五公詩云奕碁世事輸先著燕幕身謀悞後生每誦之未嘗不泫然流涕也嗟乎日月在上山河在下斯道竟委之荒煙蔓草乎聳聽跛行乾坤曷底矧於老成又去一个雖欲不銘之不可忍已君諱琛元配高氏繼趙氏又李氏又深州趙氏庭傑母也又尙氏傑娶同邑舉人王公磊女女二人孫二曰蕃曰蔚孫女二銘曰斯人之逝兮斯道之悲姑厝君於吉壤而延佇乎天衢

待贈淑人田室趙氏墓志

氏肅甯廩饒生趙君爾璧之女辛卯科武舉人田生斌之妻也。生於康熙某年月日卒於某年月日年二十九歲有子二人長玉麟方七歲次石麟六歲一女方二歲氏卒後其夫狀其行其舅與平公走人來問曰兒婦賢而早折可志否予曰可也按狀氏病姑亦病氏每以不能侍湯藥爲憾禱神求以身代得母家物必獻姑姑不受長跽以請奴婢或不恭曰此我舅姑家人我不得辱冒也弗校是不亦賢乎哉當己丑歲予西遊秦與平公延至署命其四子俱拜從遊予辭謝曰下走固不足爲師且流寓一二日卽他逝何以從爲是虛節也公曰不然使諸豚兒知先生其師也無亦悚惕乎其益不已多乎四子皆業文二郎斌兼通武予因率之入長安從何萬鍾蔡瑞生學射遂造工巧比鄉試果射標中雋以顯名於時爲人慷慨英多橋梓間皆賢而加人一等矣乃以夫之賢而哀而狀之舅之賢而欲志之氏之賢可知也爲之志固宜。

棗強戴氏先塋碣銘

康熙己巳壬申間有巡撫吳楚不避強禦嶽嶽樹政績者棗強鄭中丞也其內助爲戴夫人丙戌予與其公子交皆廩廩敦謹讀書志四術六藝諸學登堂知夫人獨存持家棟嚴守義方疑其母家亦赫奕相配云今歲二月長公子知寵拜手予曰家母於外家有隱恫焉外家先世本素封抵外曾祖有恆禮部儒士早逝室李氏外祖君貺入武庠棄去復入文庠儻好施稱長者外祖母韓氏產家母十日卽亡祖母李育之後外祖以嗜酒結客產中落子璫與家母同出次禮次瑱次璣繼劉氏出璫補諸生亦嗜客痛飲性

無城府。與人語洞達。肺肝往往直啓其機緘。弗顧也。子三人。召聘淵落拓不偶。瑱子三。璣一家母已經營。厝外祖父子二世於新阡。又以青烏家言。改葬戴氏先兆之次。家母每念外曾祖母鞠育。恨母未得侍。欲問其遺業。而肅然盡矣。語及不知。厝涕之何從也。今將伐石。轟其墓。思曾輩言碑銘必求足以傳世行後者。敢以辱予聞之。泣下。馬外大父斌。前明世襲錦衣衛指揮使。滄桑變。踉蹌走易州以卒。無男子。遺生母幼歸先孝慤。傳聞易有族人。乃尋覓之。荒村歷歷。未有省識。今戴氏幸多孫。井里依然。又何憾哉。少讀詩至長發闕宮諸什。疑之。謂商周皆出帝嚳。何以不追崇功德。而專本之簡狄姜嫄。且二妃德積淳化。其子姓皆貴盛碩衍。至今散布人間。而邵與有娥。披閱姓氏不可考。東南有窰。西北或缺。抑又何歟。或鍾於三男。或鍾於三女。乾坤變化之妙也。一以尊嚴父。一以首先妣。聖人制禮之精也。非遠覽幽通。何以與聞哉。願戴與鄭之子若孫。一有克奮。皆足以光戴氏而慰夫人之念矣。於是爲銘。銘曰。

春秋戴鄭。實繫相依。爲戴見伐。鄭取三師。奚曰顓頊。奚曰蠶靡。陰陽相嬪。皆可復始。黃瀘之涓。有鬱其阡。鑣茲貞珉。奕禩眎旃。

可母岳氏墓碣銘

氏出曷繫之可。志可也。無子曷稱母。有母之者母也。疇母之。繼妻子也。子與父之先出者情絕。何以母出。仍志可則母也。氏岳姓。安平王官屯人。歸可子仁言。患羊角瘋。可子以禮去惡疾。出之。返母家。數年瘥。而可子已再娶。或勸改適。氏不應。聞以箴綫遍縫相衣及履。投井死。母家葬之屯東北里許。可子好學。從習。

齋顏先生遊。因識予。年六十。補諸生。來拜言其出妻之節。謀將鼓吹往祭。而曰。吾再娶已出四子。長肄簡。次肄箴。諸生又次肄篋。又次肄節。夙命清明十月朔日。必往祭出妻墓。盡子道。擬遷柩可塋。而禮無其文。卽其地立碣志之。可乎。予曰。可。今歲辛丑。予自金陵旋里。則可子已卒。走弔其四子環而泣曰。先子求先生文以表節母。不果。彌留猶以手指心也。願賜文。使子姓歲時拜埽觀焉。予念方靈臬每嘆今之維倫紀者。勢利安性命者。嗜慾氏已出。何所欲於可。可何所利於氏。而氏必以節終。夫沒世不諼。諸子追祀。父亡不懈。豈非天性維結。終不絕於人心耶。抑節義烝感者然耶。銘曰。井清淪。竊幽黜。節則婦情。卽母繫。謂天之緼而人之信。萬禩眎茲文。

劉君化吾墓表

康熙二十三年八月。劉君寢疾。其子琛。長跽淚淫淫。霑裳問所語。君曰。孝讓勤儉。絮語素矣。吾志修家譜。建先人祠堂。樹麗牲之石於祖兆。未遂。而脩旃逝矣。而其瞋吾目焉。琛拜受命。家譜成。庀材修祠。五十三年。伐石。匍匐於予。求爲君表。且於先丘謀。一一矗石。君諱冲善。性如其名。幼失怙。奉母滫瀡。將以色。一從伯託孤息。爲之昏聘。無慳意。康熙七年。邑南有呼池。北爲瀨。兩河駕秋露爲虐。決禾黍隨流盡。比屋號饑流亡。君惻然。發積賑之。全活者無算。先世本山後之興州人。明永樂間。遷於安平。北白沙莊。二世仁義。三世昶中。正統辛酉。科舉人。授山東章丘縣訓導。四世澍。遇遺金不拾。待其主至。予之。五世以孝由吏員官省祭。以子貴。貤封承德郎。戶部主事。事親篤孝。人稱劉孝子。邑有二人陷冤獄。易產求孝子援之。孝子爲

營解得脫。歸其金。贖產復業。邑作三圓記。戶絃里說。則君之高祖也。又傳曾祖鑑。登嘉靖辛丑科進士。歷任戶部郎中。加授奉政大夫。有宦績。大父繼毗。邑諸生。考杓豪爽慷慨。嗟乎。君之先勞於國。著於鄉。宜乎生君之賢。表章之不足。繼之以子孫也。配馬氏。與君毗德。後君二十年卒。重呼琛曰。吾爲劉氏婦五十餘載矣。汝父寬而惠。繼之惟汝。汝父嘗欲建祠堂墓碑。汝一日不建。汝父九原中一日不甯。我積數十金。非爲兒女計。以與汝。竣汝父事。嗟乎。今人於本源每忽焉。而君夫婦乃生死以之。噫嘻。賢已。君享年六十七歲。馬氏享年七十九歲。合葬邑北二里許祖阡。子一。卽琛。邑庠生。孫一。庠生廷傑。曾孫某某。

劉節婦岳氏墓表

善與彰善。其善也等。孔子曰。樂道人之善。益矣。韓子曰。聞人之善。壯者怒於言。懦者怒於色。以怠與忌故。噫嘻。有是哉。親故不能得。而況面識。況塗人。吾見人之善。淪胥以亡。忽諸。若劉子琛者。非彝可倫矣。劉子曰。先叔曾祖諱維龍。元配紀氏。饒陽監生之女。早逝。繼配岳氏。祖故。年方十八。守節。孝舅姑。倍於夫子在時。睦娣姒。撫侄孫成立。如己出。孫卽琛父也。縣令嘉其節。歲餽金四兩。春秋賜胙。豎貞節坊。墓未剖石。勾先生張之。嗟乎。婦嫠時年正芳。且舅氏進士起家。官戶曹。赫奕宜薰灼其心。而乃冰寒玉潔。茹荼攻蓼。以終。可謂難矣。節而謂之貞。固宜。昔萬季野修明史。倩予訂。予每慨北人固陋。雖先德不知表揚。以致湮沒不登者夥矣。旣而閱世。伎狠訾訾。於其懿親師友。不少噢咻也。甯直固陋哉。賢矣。劉子之表其叔曾祖母也。婦享年八十餘歲。惟一女。適本縣生員子李善徵。縣爲安平。

彭蘊秀先生墓表

獻陵彭先生以康熙十九年壽卒。抵二十九年庚午，將葬。男潢，勾予爲墓志。歷書其孝友及養外祖母撫孤侄，傾貲贖侄之在旗者，延師教族子，德成名諸懿行，填之幽竊。及德配張氏卒，潢又竭力以禮合葬。今甲辰歲，過予曰：「不肖徵文墓道，以表先人。吾子毋以爲煩也。」保定府新城有王五公先生者，祖父仕明，烈皇帝爲闖賊所逼殉國。五公大憤，投袂而起，與其父兄友生糾衆數千，傳檄討逆闖，攻破雄縣等處，誅其僞官，開倉散食，移兵北上，而國朝兵入，闖賊遁，乃釋衆歸西山。每登雙峯絕頂，慷慨悲歌泣下，已流寓獻陵。先生乃命子潢從遊。邑士聞風競執贄，以故五公文武業獨獻陵諸子所得爲多。先生又以時率三四老友與五公詩酒浩歌，睥睨一切。後五公卒，收其孤孫，藏弃遺著傳世。先生子孫皆與有力於戲。卽此而功德莫可算矣。當崇禎十一年，國朝兵破獻城，十三年又至，城內民震讐不守，爭竄去。江把總與先生分守南城，見事急，乃大開城門，江持巨銃闌門，令民勿動。先生高六尺有奇，雄赳多力，獨握門櫪丈餘，挺出擊攻者，連墮馬一帥目之，搖鞭揮去。城得全，廣東巡撫王來任夙友善，延往爲客，牀置副萃氏半載，將攜歸，其母惟一女相別大慟。先生遂還其母，不顧而去。乃僅以素封騷雅終，又可嘆也。張配能助先生施，自喪亂後，全活無數。先生諱毓宗，字蘊秀，家世姻戚詳墓志表，不重述。

六真居士劉君墓表

予論學重存誠，而不言真。以真，聖經無之，而出二氏也。漆園曰：「采真貴精也。」宋儒以詰誠爲也。乃今爲劉

君表慕稱六真居士。何哉。曰。六真者。寄也。有託而逃焉者也。一曰真貧。君有故田宅而擲去。遊屐所獲。亦或千百金。而信意揮灑。購書締友。僑所必屏帳衣衾鮮具。橘柚粒糒。蒙頂楚瀝。平頭代侍。或勸之積貯爲妻子計。笑而不答也。一曰真醉。君能飲不亂。其醉也醒也。嗜友善。髻鬣與同邑龐雪崖檢討共硯席。後邀遊九寓。如孫徵君。傅青主。李天生。王人岳。宋式之。皆過從。來問奇者亦接引不倦。然懸直面折人過。遇俗士輒白眼。曰。吾醉矣。其四真。則拙也。嬾也。狂與隱也。幼攻詩書。十二歲。遂餼於庠。又好技擊。毀鈴諸學。隨父方若公。代州商州二任。能佐經濟。已而應順慶王守聘。值吳三桂叛。陷於蜀。陳其年爲龐檢討序詩云。故人遠別。飄零爲胸臆之蠻。是也。及奮威將軍王公兵至。聞君名。咨以方略。遂平蜀。疏其功。授鹽亭縣知縣。有政蹟。旣以離父母久。歸里。孝友甚。邑令爲登志書。憂居後。乃縱遊衡華。大白洞庭。西湖。天台。武彝諸勝地。歲嘗數千里。每歸。不復入里。僑東郡。孤筇獨屐。往來浮丘。如是者三十餘載。卒於寓。寓栽花種竹。日讀書其中。暇更以鍼砭起人疾。立起。非拙而嬾也。且自贊曰。介隘與不恭。材不材間。又曰。世既不知。以無用爲用。宜高閣於匡廬。武夷之山。亦詎放狂而石隱者耶。矧日遊歷而曰居。已官矣。曰士。何一非寄而逃者。當崇禎之季。天運地輟。已而興朝定鼎。吏驟民來。乃又三藩潏洞。乃又羽書消沈。而君適與俱。乘風破浪。咄嗟立辦。亦復避人謝事。一咏一觴。時而繩墨如道學。時而溟滓如方外。時而烈士。時而墨客。捭闔担矯。惟變所適。世又烏能以測君哉。予初識君於長安。以周崑來。悄乎其有遠志也。後又會於隴陽。今君去十餘年矣。而予亦老。因念夙昔多瞻顧。不如君少時勇於敢爲。今復以妻孥累。不能如君之侃侃不顧。皆

可愧也。君長子濤，好學有文，奉君櫬歸塋故里之某原，屢以君行述請言，未敢應也。今又來匍匐力求表，可謂有子矣。乃以不文者表之。君諱鑣，字長馭，六真居士，晚年自號也。任丘人。卒在康熙五十年八月，得歲七十五。祖父以上皆有顯者。初娶王氏，在鹽亭，又娶陸氏，子三，長卽濤，廩饒生，次澧，次泐，庠生。俱陸出女，五俱王出，孫四。

張肆六曰：劉先生想是極有爲人，不得志，託於拙隱遨遊以終，文以神出鬼沒之筆寫之，如其人在三山風雨中，可望而不可卽。

恕谷後集卷八

玉峯太翁挽辭

我山二兄篤孝。今歲癸未秋杪。塋如京。適值其輅玉峯太翁養於邸。董榆滲漣。婉笑將之。屬屬如也。乃無何而玉峯太翁以老疾捐舍。慟哉。我山胸坦直。無畱餘。一諾千金。素好慷慨悲歌。矧際大變。懼其過毀也。乃作輓詞。一以妥幽。一以寫孝子之哀而節之。詞曰。

黍谷懷慄。兮朔風城。巫陽難問。兮天自高。鬼伯紛拏。兮餒其曹。魂竭來兮。突夏羅。餒餒兮。人駕馬。都門以馬致東國烏面。醢骨兮。不可以恣遊。匹練吳門。兮遠何求。靈无逐魄兮。山阿梅馥。堂下兮。紛純綠波。式觀

苦由兮。孺慕在茲。明德尙馨兮。終古永之。

劉君遺惠辭

劉生員錫若。旣卒之明年冬。鄉人念其處里黨。不爲概梗。遇癰頑。嚙嚙然通稱貸。弗株刻。公設爨弄以侑之。其二子慨然曰。誰歟。不忘吾翁者。而吾敢忘諸。割牲薦先。以醺鄉人。嗟乎。劉君有遺惠里之人。不忍忘。與其子之願。揚前徽。皆可風也。乃爲之辭。辭曰。

西阡簫鼓兮。趙倡舞。餽餽大嚼兮。紛如雨。款等夷兮。歿之灼。寒之柳兮。餒之乾。不見豐隆降。割兮歲不康。千仞九首骨爲梁。予髮之華兮。目若營。對此空拳兮。靡甯。

挽方靈皋之母吳太君辭

蠡吾李塏聞方老伯母吳太夫人以康熙五十四年冬底壽終京邸哀徵音之不再悼孝思之罔極乃爲辭以挽之辭曰靈振觸兮曷往窈窈冥冥兮舂蠶湖北轍兮肅爽曰吾丁吸紫庭之沆瀣兮金掌出駟螭兮入乘鸞貂裘蟒服兮陸離青瑣齒齒兮丹墀拍肩把袂兮龍夔陰山連延兮崩巒從六華兮降陟雕題拱趨兮萬幕修文誥兮飛霹靂米園兮張鐙太微垣之兮玉繩四廚五車兮增增丹鉛供兮建瓴饗樂只兮步壩摩吾丁兮棘槐巖巖衆鬼擲榆兮旋淚集衫雜選邀兮揚帆式容與兮子舍甘疇知匹練兮江之南

待贈太孺人顯妣馬太君行述

嗚呼慟哉先孝愨大人以純孝易名不孝等承之智昏力惰菽水不足鳴歡服勞但多搪突求如先大人孝思無一二而先大人逝矣先嫡妣馬太君逝矣今顯妣馬太君又逝風木悲增補愆無由嗚呼慟哉顯妣姓馬氏易州人外祖馬公諱斌明錦衣衛指揮也甲申自京師蒼黃走易州卒藁葬西山僅一女卽顯妣外祖母過氏撫之焚焚無依年十四歸先大人遂同如蠡及長如易尋外祖邱壠而莫可得矣問馬族皆非顯妣終身念及輒流涕慟哉顯妣性仁孝相先孝愨有一德王五公作孝愨記略云事父素先翁雞鳴盥漱堂下拜然後升堂聽寢聲徐徐問安翁春秋高日五六食嗜滷熬及純肉餽牢丸必手進皆顯妣從嫡妣夜半起卽炊爨佐之也先大人事世父保初公如事父推讓公田叔父餘初公父子相繼歿

入城經理遺孤。至破產不卹。皆顯妣從嫡妣勞以隨之。未嘗撓一婦人言也。寶靜庵孝愬傳云。孝愬絕意榮名。客有從史者。飲以醇酒。曰。但飲勿言。晚年家落。窮甚。口不言貧。乃顯妣推磴茹荼。辛苦以佐清高。未嘗一作蹙眉也。至方靈臬作顯妣壽序云。姑吳太君。耄年日昏。洩便皆孺人扶持。溫湯藥。潔廁腴。惟謹。太君安之。居母過氏喪。期屏酒肉。助祭必虔。拜必肅靜。無一言。是與先大人合德。以力聖道也。惲臬聞壽序云。太夫人性禮賓客。聞有道士至。傾筐倒庋。惟恐不及。故四方知學者。樂過從其子。是不孝^嫌等妄倡明聖學。以聞諸人者。顯妣力也。顯妣事先孝愬。酒穀舉案進。有餘則閣藏。不以入口。其後事嫡妣也亦然。當大人在時。佐嫡妣家。榘猶偶有錯互。及大人去世。事嫡妣如母。務得其歡。數年無一語愆拂也。樂施與。族嬭歲時必餽遺。周里貧者無倦色。見比鄰孩童入。隨手滑膏撫字之。不計其數也。東曹家。慕嫡妣外家也。北泗王氏婦。乃嫡妣所出。先姊卒。續娶者也。顯妣皆時廬懷。餽問不絕。顯妣初歸時。或易之。有亢容。及後德溥而尊。有舉舊者。曰。忘之矣。旣而曰。人薄吾以厚。人亢吾以謙。念舊非吾事也。蓋寬仁誠篤。與先大人嫡妣合德無間云。顯妣聯產不孝^嫌等五人。體稍弱。而精神有餘。平昔大人庭訓。忠孝節廉。已時皆闡記。時舉以訓^嫌等。所供衣服。視孫幼欲者。卽與之。耄年猶紡績。勸之息。曰。某缺。某某將親迎。吾織而布之。樂此不疲也。康熙五十年。不孝^嫌以舊里不能容。移東莊。顯妣往來兩地。居甚健。及五十七年。在通迎養。飲酒日數次。肉亦健食。又逾年。躋八十。親友羅祝。猶健。自幼食最緩。入夜。必食後寢。以爲壽考未艾。孰意今康熙六十年春。作疾。延縣至閏六月。念四日病。呼弟^培等皆至莊守視。顧^嫌等無所囑。惟囑五弟子習。

智勤讀。顧壩曰。佐之令人泮也。又顧培等曰。趁而大兄未甚憊。吾可去也。七月念六日丑時。遂卒。嗚呼。慟哉。生於崇禎十四年九月十一日子時。距卒。享壽八十一歲。憶顯妣坐語堂上。每曰。而先外祖外舅過公。邦權勳爵。官更鉅。宅畔有花園。崇禎朝莊烈周皇后微時與之鄰。嘗過往。而外祖母每資之箴紈服飾。相歡好。一日。摘花園瓜。過公從外入。見之大怒。踢其筥。嚇而奪之。周皇后泣去。已而還爲信邸妃。遂登后位。過公懼辭官。內寺來尋之。匿。而外祖母應曰。往南京矣。后寢其事不問。每念昔日家門之盛。先朝寬巨之恩。未嘗不流涕也。乃至今顯妣溘逝。並此言亦索索成往事矣。嗚呼。慟哉。長男卽不孝。壩康熙庚午科順天鄉試舉人。選通州儒學學正。告病致仕。娶王氏。繼娶馬氏。置側室呂氏。馬氏二。壩先卒。娶張氏。繼娶張氏三。培保定府學廩膳生員。娶賀氏。繼娶白氏四。壩保定府學附學生員。娶王氏五。壩先卒。娶馮氏。孫男八人。長習智。壩出。娶任氏。次習仁。壩出。保定府學附學生員。後顯妣十八日卒。娶宋氏。次習聖。壩出。娶崔氏。次習中。壩出。保定府學附學生員。娶齊氏。次習和。壩出。聘劉氏。次習孝。壩出。聘龐氏。次習任。壩出。聘賀氏。次習禮。壩出。未聘。孫女八。壩出。先卒。適彭庠生汝霖。次壩出。卒。適吳生捷。次壩出。適汪庠生作哲。次壩出。適劉庠生□□。次壩出。適姚□生□□。次壩出。許字趙生□□。次壩出。次壩出。未字。曾孫男一元。凱。習智出。未聘。曾孫女二。長習中出。次習聖出。未字。顯妣將以十月七日附葬舊里西曹家。最先大人窆。不孝。壩等泣血謹述。

長子習仁行狀

嗚呼。吾兒攬衣出門無幾日。忽長逝。慟哉。吾兒習仁。予之長子也。冠其師馮樞天字之曰長人。康熙三十七年戊寅。予館桐鄉。知縣郭子堅署。娶副室錢塘貞懿呂氏。以十二月十二日巳時生焉。時呂氏方十六歲。產難。及娩。頭如世所寫壽星。五六日漸縮而圓。予以四十始立子。憂其脾脆。飲食必視之。令勿多。面方五官中正。白瑩如玉。予以白嫩軟令坐土上。汗浹土。漸變蒼色。幼不好弄。儼雅如成人。童伍或狎戲。則正色諭之。八歲。教以小學。灑埽應對惟謹。五十三年甲午。邑令浦鳳巢延憚皋聞至署。教其子。因招習仁同受讀。數月文漸通。丙申春初。學院張天門臨試。拔入保定府學生員第四名。孝友性成。終日隨予。視色爲行止。每日凌晨。或二三漏下。呼卽應起。祁寒暑雨不避也。凡事必稟予。卽極細事必其爲之。予心乃貼。五十九年冬。從予如江南。衣被飲食騎履必躬奉。生九歲。呂氏卒。偶與二子習中諍語。馬下妻戒之曰。而姨留而兄弟二人。幸勿爭。自是寬待之。無一言齟齬。三子習禮。提攜懷保倍愛護。人不知其異母也。予往通州爲習中親迎。衣飾器用。務豐於予之爲其親迎者。習禮樂習邃未成。習農。予教曰。而多直理而少曲。思兵變化俄頃。無究也。習射習書數御。性優。十餘歲卽能磬控騎生馬。鞍轡韉策皆手製如法度。御車人苦歎段代御。不施鞭捶。卽飛騰。嘗立日譜課身心得失。其立心也忠厚正直。終其身未見有一念私曲。未見有一語非道。一履非法。日必有事。未見有一暇期也。聞予語學。皆怡然解。著學說庭聞記。自厲能閑。家晝不輕與妻接語。每食時從外歸。必入予寢視祖母視予。未嘗無事一入其私室也。且通世故人情。賓至予家。或數日或數月數年居停。日率弟躬進茶食。無倦色。賓率稱快去。待戚友悉中禮節。張皓千稱之曰。

長人見人。喜容可掬。一團和氣。劉士宜居密邇。予東莊。嘗往來莊之河口。謂人曰。吾每至莊。習仁必來尾邀食。若特置郵報者。至江南。周旋儒雋。如翁止園。程啓生等。彬雅和藹。每補予不及。甯國知府黃瑤圖。握其手曰。踰歲尊翁卽不南。世兄幸必過我。蓋人人愛而敬之也。能料事成務。一日梁楷積少數束。莫知爲誰也。呼問之曰。必賃屋人。因其婦產三日。易蓐加草故耳。察之果得。幹事必周密。制器必工牢。方靈皋子道章。成昏保定府鹿氏。其司囊囊有勅張爲之排解。且制其用適足。靈皋聞而趨之。收爲門下士。先是予從王五公顏習齋遊。每言南土無北鄙殺伐聲。宜遷。予亦謂金陵地廓人文。或可倡明聖道也。己亥。適南友許以高瀋田。易予蠡產。客冬。遂率習仁往視。語之曰。汝祖母春秋高。吾不能遠離左右。汝若以爲可。則先遷。予後成之。習仁曰。唯。今六十年辛丑。友人有其室舟而南者。因約習仁偕婦同行。七月。使來促問之。應曰。婦女難獨出。從之便。又謀三弟四弟曰。可。遂以二十二日如京。熱意二十九日卽病。病卽一粒不下。咽猶倔強步行。八月五日。天津登舟。病愈重。已賃車旋。比登車曰。吾已出門。又返里。何兒女態也。服藥行且瘳矣。復返舟。抵十四日。覺病篤。使其婦之表叔從於舟者來。稟予取車。晚置藥不服。婦自後艙來視。囑曰。吾亦爲人。草留根。人留子。婦泣下曰。勿泣。外艙汝不可久留。命之入。惟一幼僕守視。亥時。臥而卒。地名泊頭。年僅二十四歲。婦宋氏。有遺腹未產。車到歸櫬。嗚呼。慟哉。家人戚友聞知。慟哭失聲。莊人樵夫牧豎。無不流涕者。在予垂毫學退德衰。過惡稠疊。獲天之譴何辭。但以習仁之才。且有德。雖視之古聖若賢。渺然以小。而考其所至。庭除克孝弟。於道有見聞。家邦稱達士。突爾隕折。慟哉。然天亦或以成人處之矣。卽

此南行一節。慷慨獨當一面。見者大。雖病殂不悔。不可謂不賢於人矣。聊爲之狀。惟君子鑒而品置焉。歲之八月下旬。

附錄習仁日譜儀功。卒後檢其南行篋得之。自戊戌年元旦、清明、七月十五日、十月朔日、臘月二十四日之祭。俱從家大人齋戒沐浴。大齋戒二日。不飲酒。不茹葷。不與穢惡。不入內。不弔喪問疾。齋一日。遷坐思神。小齋一日。每月朔望。從大人拜獻家祠五祀。拜祖母父母。拜先聖。每日晨興。揖祖母父母先聖。教習中讀書講書。定朔日習禮樂射。望日習御書數。其日有事。以次日補之。三三日看經史遺文。及顏習齋先生與家大人所著書。三八日會時文。餘日古書。或時文隨便。有家務農事。及應酬人事。大人命者。隨命行之。立日譜以考功過。時時澄心。頭容直。氣容肅。目容端。口容止。聲容靜。手容恭。足容重。色容莊。立容德。謹言慎行。體察人情。每時一圈。心自慊則白。有言失則黑圈左。有事失則黑圈右。有慾念則黑圈下。有暴怒則黑圈上。忽忘驕肆則黑圈中。

附方子靈皋所作李伯子哀辭

李習仁。字長人。吾友恕谷長子也。戊戌春。余命子道章就學於恕谷。歸言習仁耕且學。孝友信於其家。今年春。恕谷歸自江南。率習仁過余。俾受業。其承親事師交友。毫髮皆在於禮。而行之甚安。河間王振聲見而歎曰。子弟中未有如斯人者也。恕谷少游浙東西。樂江介士風。南中士人亦聞其風而慕之。故率習仁往相宅。其乘車。習仁御騎。則執鞭以從。恕谷與諸公論學。左右其間。南士皆傾心焉。恕谷以母

老未能定遷。會其友內人南行。使習仁與妻附舟先之。至天津疾作。將還。比登車。曰。吾父志此久矣。疾當愈。何返爲。還舟又數日。疾革。其妻出視。命之曰。勿泣。此外艚。汝不可久留。夜將半。氣絕。惟小僮在側。時康熙辛丑八月望前一日也。昔明道程子誌其子邵公。謂賦生之類。雜糅者多。而精一者間或值焉。則其數或不能長。夫自古聖賢之生。鮮不爲帝王公侯卿相。蒞壽長世者。而程子之言若是。豈如衆人之激於所遇耶。蓋深觀造化之消息。而有以窮其變也。余杪秋自塞上歸。聞吾友劉古塘長子將冠而殤。南中子弟無與比並者。慘慟未平。而習仁之訃繼至。嗚呼。以恕谷古塘之躬行。日暮途窮。而天奪其良子。以二子之資材間值。而不能延其一日之生。此余所以易哀爲憂。而終之以懼也。習仁自成童有巨人之志。旣冠立課程。自檢。晝所爲。夕必籍之。卒年二十有四。妻宋氏。始有身。其辭曰。嗟爾幼志。離羣匹兮。善承親心。嗣道術兮。晝耕夜誦。六藝畢兮。性栗而溫。饑有壹兮。焚焚南行。志決壯兮。知命不惑。死無恨兮。任道有徵。識祈禱兮。斯人則亡。余復何望兮。

附閭季伯所作李子傳

李子長人。吾師恕谷先生冢嗣也。諱習仁。桐鄉令郭子堅慕先生如骨肉。迎至桐。廬先生抵四十未立子。重聘武林姝女呂爲適。飭留春樓居之。環置花木可孟植者。每入夜。燭必結蕊如幃頭如綴旒。自巔垂垂至跋。四壁香氣清徹。黃楊梔子月季皆結子。蘭生蓀子堅聞而雀躍曰。吾友獲佳兒決矣。先生持家以禮。呂如君入。卽定行朔望望拜姑嫜及女君禮。及身訓以胎教。卽以是年十二月產李子。瑩潤如

王、先生攜之北歸。親串咸指爲玉人。比長。身中方面。淺鬢如晨星。不甚見也。五官方正。善騎。衣飾按轡疾行。路人聚堵驩羨曰。翩翩佳公子。而能摧折浮英。自成立。服惡食麤。嘗自運坯墁牆。躬監燒窑。五夜無倦色。東莊築正樓。東西廂。前場後圃。率出其經畫。及從先生南行。嚴冬。值荒塗。夜必起坐。飼騎守備。入甯國。行青山道。雪後紅泥沒脛。迄歸滁。徐雨。雪深數尺。路皆覆。李子步衝雪先行。先生尾之。無迷者。而志氣倍王。憚鶴生皋聞者。武進人。博學有文。聞先生來。蠡得顏習齋先生三事三物之學。遂盡棄其夙學而學焉。先生雅重之。命李子從遊。學日益進。會學院張公逸少案臨。京江相公子也。家世崇高。而嘗作不平語曰。今泥塗崇高者。其李恕谷方靈臬王崑繩乎。然臨保定卽尋先生子。得李子名。年十九。拔之府庠。先生於先儒主敬存誠。以及讀書經世諸款。一一剖決其得失。精微廣大。而李子皆能領受。躬習其學。著學說庭聞記。立日譜自省。善接人。曲體情意。笑語進退如矩度。待嫺戚有禮。四方來從先生學者。如華州古葵。武昌劉著。博野周文忠。或居數月數年。盟寢衣食。咸李子周旋。無不相結意。滿而去。方靈臬。楊賓實。以夙儒巨人。李子師友之。皆獎進恐後。以至射御書數。擅名如張曉夫。身在修。蔡瑞生。周崑來。亦攜手欣然。願授之藝。旗人張萬載。一日薄暮。衣短襟衣。跨蹇騾過先生。卒然問兵。先生曰。吾少時以貧硯食。門人習武者。請講孫吳。強就舊話答之。而實不解也。今老病。並舊話忘矣。焉知兵。次晨卽車如棗強就醫。而萬載去後。萬載以妄言被逮。詞牽楊仁澍。並供先生有相才。當事奏聞。辭中人遣部郎捕。先生聞之。恐同人震懼。惟語李子。李子時從先生於保定。應張學院試。趨侍承歡如常。若無

此事者。既而仁澍受刑。力保先生正學不濫交。九門提督彤公。刑部尙書韓城張公。亦知先生無他。獨不問。迨年餘。萬載及諸人就爰書。事方結。而李子終不向同人一語及也。其靜定如此。及奉父師命南遷。師則靈臯也。登塗病劇。遣妻之表嫺王旋里。曰。爲我語大人。兒病九分。九分十分也。言九者恐傷親心也。惟此一語。別親哀鳴之聲也。王行卽知不起。卻藥不服。意氣自若而卒。年二十四。初。李子十三歲行冠禮。十八歲昏有室。先生卽令理家政。每雞鳴。從外庭呼曰。大官。李子卽唯起。問所爲。承命指揮家衆井井不羣。飲不戲嘲。未嘗銜首伋立與人一閒語也。出入必揖先生。稟午旋無延至未者。得尊長賜。嫡母爲之生息。積銀數兩與之。李子曰。吾不願私畜也。盡供公用。卒後。先生家人哭之慟甚。或解之。家人曰。如之何勿慟。卽如有一事。李子欲爲。微察父不願。卽止。吾家宅移東莊。而莊中有倉有廐有僕舍。莊西陲有羊肆。李子日往視。或時呼母弟往。必見其庭中延伋。弟速應出。則已如應。緩或未出。卽自往。不再呼也。嗟乎。孝友之狀可掬矣。一子曰敬。承繼其世。當李子有時。先生嘗語人曰。吾長兒勝吾者二。夫婦有別。成童後卽能之。吾自返不及也。吾期治生儉而不刻。御事細而不煩。日以道爲比櫛。而猶有踰。長兒不繩削而自合也。方靈臯哭之曰。李伯子舉動毫髮皆在於禮。而出之甚安。閤鎬曰。吾念李子爲之質經。魯論論士曰。行己有恥。李子有之。出使不辱命。未之試也。而其才可能也。宗族稱孝。鄉黨稱弟。又有之言。信行果。又有之。切切偲偲怡怡。李子亦有之。質直好義。察言觀色。下人亦有之。卽世之積學累世者。何以加茲。以斯人而年不期頤。誠可悼。然人則成矣。德則不朽矣。豈爲夭折哉。豈爲夭折哉。

恕谷後集卷九

孔子贊

猗與孔子萬禩之師。庸德之行。庸德之知。不言性天。下學達之。在帝左右。於戲至矣。

先孝愨像贊

貌也蒼然。身也挺然。方領六合。坐對於天。守禮好學。步趨曾顏。既文且武。佩劍鳴弦。維誠維仁。亦白亦堅。人一以爲鍾瑾。人一以爲幼安。孰知今世而觀義顓。

與周崑來王子丕求小照札

予貌亦寢。頗具須麋。偃僂五尺。而欲頂天立地。意營四海。而斤斤視跬履。頽仰與廣大高明者遊。而屋漏火熄。或承之恥。業非道學。亦非名士。不作通俠。復鄙山壘。巨靈搦管。或能加棘策乎。以究予之所底。

養生論

不見居室者乎。耕田鑿井。量入爲出。餘一餘三。本富也。而貪者以爲未速。恠其出焉。而猶曰未速。轉輸而貿。甚者盜之人。附之己。量入爲出。其富沿百世無弊。先人甚嗇。子孫必以奢敗。天道也。人事也。轉輸有無。非決勝之兵也。或勝或北。若盜勿使執法者見也。見必誅。世傳養生術如廣成子老氏以及魏伯陽。與近世探補之妄。其過凶以此爲差。

此前集一篇也。以其言可正邪說。梓之時。先生臥疾石門府。石門退朝。卽調侍藥餌。先生口授此篇。及人論關佛論。石門斂手曰。先生沈病。而心志清定如此。四德根心深矣。

父子有親論

堯命契教民人倫。父子有親。言教子也。奚而不教父也。父不待教也。大學曰。未有學養子而後嫁者也。或曰。教焉。宣尼曰。愛之能無勞乎。石蜡曰。教子義方。恐親之過也。若子則無有過也。舜之號泣。黔婁之嘗矢。非過也。無不及爾。親達和。刲肌而晉之。過矣哉。而或以激。或近名。仍不及所致也。吾見今之子矣。其父母老而貧。與命曰家人厭。何癰癰累累者爲。老而富。與命曰家人征。明之取。暗之攜。厚得則以爲快。少則怨。嗚呼。不有聖教。親生至此。故彝倫斃。異端興。

論古文尙書

惲皋聞謂予曰。讀毛河右古文尙書定論。以爲出於孔壁。上於官府。傳於人間。至晉祕府不失。梅賾奏上孔安國傳。遂列國學。考之史志。鑿鑿無可奪者。但古文辭明顯如出一手。誠有如宋明所疑。何也。予曰。嘗亦疑之。但萬季野有言。讀書當論道。不必以辭。以道則古文无一可駁者。先儒皆故爲偏說也。皋聞曰。然但愚意其辭當是孔安國考論時所潤色。故髣髴一轍。非晉人僞作。予豁然疑解。史記曰。孔氏有古文尙書。安國以今文讀之。漢書曰。安國以今文字讀之。書大序曰。科斗書廢已久。時人無能知者。以所聞伏生之書考論文義。定其可知者。謂古文皆科斗書。世廢已久。不惟人莫能知。卽安國亦不能盡知。乃以伏生

二十八篇在古文中者先對讀之。以辨其字。而因其已辨之字以讀其他。又得二十五篇。文義可知。文者字也。義者理也。或卽文以見其義。或因義以辨其文也。吳澄謂傳記所引。收拾無遺。是安國考論時。又雜取論語孟子春秋諸子以證之。其用力亦苦矣。又藝文志劉向以中古文校歐陽大小夏侯三家經文。酒誥召誥皆有脫簡。文字異者七百有餘。中古文卽內府所藏孔書也。歐陽三家經文。卽伏書也。脫簡謂古文脫簡也。是古文與今文同者。當時亦有脫簡。則古文二十五篇。獨无一字脫簡乎。其爲安國以義定之也明矣。古文與今文字異者七百有餘。是安國所讀之字。今古尙有如此參錯。則辨其字不能得遂以義定之者。固閒有矣。其詞通曉如出一手。誠安國爲之也。然此安國之不得已也。非作僞也。若作僞。渠豈不明見今文有險有易。何不定古文亦仿效之。乃如出一體乎。況讀以今文證之。他經他書。則不敢憑空闌入一語也。更可知矣。陶淵明曰。區區諸老翁。爲事誠殷勤。知言也夫。

陳法論

陳法。伍法也。什百千萬億異其數。方圓曲直銳殊其形。鵝鵠魚麗握奇編劉八陣六花五行三才十二辰別其名。天地風雲龍虎鳥蛇詭其象。兩前伍後。專右參左。遇地而參差。奇正揚伏。備偵游。兩翼卻月。分塗而各用一也。雖絕成陣。雖散成行者也。鵬之圖南也。背負青天。搏扶搖羊角而上九萬里。與斥鷃之騰躍有二乎。八家共井。猶蹟迹也。而千里一圻。懷嶠帶嶠。特積耳。孫子曰。治衆如治寡。分數是也。吳璘爲疊陣。曰。此古東伍令。其知之矣。項王善萬人敵。及後東至東城。麾下二十八騎。分四隊四嚮。令四面馳下。期山東。

爲三處。可以觀矣。霍去病張睢陽岳忠武不必拘古法。有以哉。若史記李廣出塞。行無部伍行陣。就善水草屯舍止。然遠斥候。未嘗遇害於戲。遠斥候也。有部伍乎。無部伍乎。惟好學深思心知其意者解爾。

見百字說

鄭子名臣。家嗣雅好學。以其名知寵也。問字於予。予惟老子有言。寵之辱也。得失若驚。故又曰知其榮。守其辱。爲天下谷。噫嘻。知之時義大矣哉。谷。龍之府也。龍。寵也。古文寵龍轉注。詩云。爲龍爲光。何天之龍是也。吾聞驪龍之精。百里見毫釐。故乾之同人曰見龍。苟見龍之見乎乾五位。天寵之矣。迺字曰見百以復之。

樂說

宋人每令人尋樂。予謂樂不可尋也。尋之則莊老之學耳。儒者盡其道。樂矣。因就身所歷者作樂說。趨鯉庭。栽荊桂。萼苻菜。供萱華。心怡氣和。此庭闈之樂也。予曾歷之而未盡也。理安舟而泛千頃。躋危崖而眺九霄。心曠神夷。此登臨之樂也。予曾歷之亦未盡。公卿前席。學士偃僂。銜杯雅談。千古歷歷。貴賤何知。緊道是視。此忘分相交之樂也。亦曾歷之。嚴師諍友。擿爬瑕類。得省得改。如脫宿垢。更有海內名流。風生四座。徐出一言。羣賢謬折。謂聖道在茲。有目共覲。亦有後進英奇。離塵捫天。刮摩日月。指畫谿陵。此會友折中之樂也。亦曾歷之而猶未盡。未能大行。聊佐人政而已。灑然改觀。曠戢屏彊。巷誦戶說。惟恐遺去。此道小試之樂也。更未盡。張唐琴。演周儀。調游龍。挽明月。黃農虞夏。一堂晤語。好學之樂。樂以終身矣。乃

猶未盡。必也周旋中禮。心性欽明。無動無靜。惟天與偕。雍雍肅肅。無自來憂。安所鳴樂。樂斯至矣。苟臻斯境。前六者皆樂也。不臻斯境。六者必未盡善。不可遂云樂也。

豚彘說

幼聞一狎客問一先生曰。今旗人食嫻猪。古亦食否。先生曰。古人豈有此。客曰不然。孟子言文王令民二母彘。彘子必繁。難以畜。家有之則不可賣。不食何爲。其人無以應。予註孟子至雞豚狗彘之畜。訝雞犬皆一。而豕獨二。何與。因考埤雅曰。豕子曰豚。玉藻圈豚行不舉足。齊如流。古者祭祀必先擇牲。謂養豚於圈。君袞冕而臨之。則行不舉足。齊如流。所以致敬。且稱其服容也。是嫻彘古用以祭矣。左傳有牲醴肥腍之文。曲禮曰。豕曰剛鬣。豚曰腍肥。二物二名。二用分如也。說文則曰。牛羊曰肥。豕曰腍。豚曰腍肥。蓋言兼之。豕卽盛滿而鬣勁毛長。不可言腍肥矣。腍肥非豕子而何。雖欲勿用。神其舍諸。神不舍。則人食之固宜。議禮者勿少見而多怪也。

書明劉戶郎墓表後

梁少保夢龍爲安平劉戶郎鑑作墓表。載嘉靖二十九年。俺答犯順。直逼神京。援兵四集城下。戶部選曹屬給餉。皆畏避。劉公奮然請行。衝鋒抵大通橋。餉以給。嗟乎。公加於人無算矣。當是時。兵火燎原。大掠城外。號哭之聲。徹於西內。舉朝震恐。世宗詔犒勤王師牛酒。不知所出。部文往復二三。始得數餅。開倉發粟。囊橐釜餽。一無所措。士多餓死。嗟乎。以中葉全盛。太祖太宗之神威未遠。而惶惑無具。至於如此。所謂部

進鄉舉。纍纍若若。其素揣摩。以應朝廷者。是何物也。承南宋道學後。守章句。以時文應比。高者談性天。纂語錄。卑者疲精斃神於八股。不惟聖道之禮樂兵農不務。卽當世刑名錢穀。懵然罔識。而搦管呻吟。遂曰有學。萊陽沈迅上封事云。中國嚼筆吮毫之一日。卽外人秣馬礪兵之一日。誦其語爲之慚且慟也。嘗披廿一史。漢唐北宋名臣。率在北方。及南宋而北人寥寥。以北爲金元也。萬季野修明史。邀予閱。明南北混一。乃史載北人亦少。季野頗嘆息焉。明宣宗曰。長材偉器多出北方。而如吾蠹三百年。僅登一布政楊瓚。舉廉賢。奏議增附生員。他如僉都御史張哲平冤獄有軍功。給事劉穆能直諫。副都御史劉瑀居官清嚴。御史韓春劾宦官李興忤逆瑾。華州知州劉錦拒中官廖巡撫張貫陝西。行苑馬寺少卿冉繼志忤逆瑾。兵部右侍郎丁鳳正德間定宣府兵亂。平山東江西流賊。撫治鄖陽王道平野王剛亂。參議和遜有清名。工部左侍郎馮蘭稱文學。戶部郎蔣範化殉城守。一時聲蹟爛焉。而史冊悉亡其姓字。北之他郡邑可知矣。南好浮華。北習固陋。毋怪史傳之南多而北少也。劉子琛屢求闡揚其祖。有以也夫。

書貞靖先生傳後

宣尼曰。舍藏藏其用之則行之具也。後世隱栖者流。大率餓鼠病獮。胸無襍積。其藏者云何。至於終南捷徑。鉤名弋榮。與夫挾雕蟲技。操齟齬行。而侈聲色。養滋味。且顛倒人家國事。而稱高尚。是不嫁而嫁畢者也。又藏之罪人矣。尙何藏。貞靖王先生留意江防海防。漕運鹽鐵。兵屯方輿。水利諸學。而晦迹烟霞。可謂

爲仲者又何也。

書韓子原道後

大學曰明明德。又曰明明德於天下。如日月經天。萬古常照。書所謂克明俊德。光被四表。萬世永賴是也。佛氏明心見性。則腐草之螢。熠燿之光。淺淺乎明滅不定。何用乎。而愚劣惑焉。是仰首不瞻日月。而以隅廁之明滅微光爲奇也。韓子原道斥二氏亮矣。佞佛者曰。韓之見佛之粗。未解其精。故系以此。

書方靈皋一節

庚子冬。予問醫如金陵。曾克任爲予言方靈皋內子蔡氏歿。薦紳慕其名。競聯姻。大學士熊賜履謀妻之女。謝之時有鄭總兵巨富。倩伍解元涵芬緩頰。願以萬金爲橐。使可贍九族三黨之餽。問者靈皋辭不獲。一日暮食罷。語克任曰。請姊丈後。因告之故。克任曰。非孟子之言所識窮乏者得我乎。靈皋立嘆曰。然晨興峻辭。熊尙書一瀟。其子本靈皋同年進士。祕謂曰。鄙人有妹。家君願使侍箕帚。靈皋日感甚。然寒舍家法。亡荆偕姊姒日夙興。精五飯酒漿。奉卮匱二親左右。君家媛能乎。本昨舌無以應。又言其丙戌成進士。歸過揚州。鹽商吳求設帳教其子。贊百餘金。及抵里。總督藩臬公留之義學。乃使返其贊。吳曰。非先生辭我也。勢不能也。贊者見也。已見何返。靈皋不可。三往返卒還之。金陵一王生執金爲贊求教。介甲姻來。卽贈甲已而王生卒。靈皋曰。教未之及。安用其儀。自出金如其數。使人奠。並不言之甲姻也。予渡秦淮。靈皋綱紀趙姓者從路指北首一門曰。此百萬富也。吾主在家時。渠遭喪。延點主。以百餘金爲壽。主曰。吾膝

可屈守財者墓乎。卻不應嗟乎。日讀聖賢書。一臨財色輒隕穫。視此何如也。詎無聞風而起者歟。

題甯國府志

甯郡署後有古北樓。在陵陽峯上。卽齊謝朓高齋也。樓前並刻唐李白詩。志乘豔傳之。考朓傳守宣城。不載及民政事。或史遺之也。然味其詩云。旣懽懷祿情。復協滄洲趣。則專藉祿仕以遂其曠達。意可見矣。李白流夜郎返。而往來宣城間。惟狂放詩酒。視管甯避地遼東。設禮條易其風俗者。相去殊遠。嗟乎。前人流風餘韻。擅其迹。載之志。所以興起後人也。可不慎與。康熙庚子冬底。墟攜長子擇居來過。守爲黃公瑤園。見莅政愼勅。不驚嫺文。其度越前賢。若當有在矣。因書此二通。一題志。一寄梅子定九。

堅志

馮生辰侍李子曰。子何志。曰。修己及人。守先待後。曰。善哉。是士之業也。志之固宜。馮生曰。願有誨。用堅辰志。曰。志則堅矣。不堅可言志哉。雖然。亦有之。王法乾每言中庸曰。惡於志。是我志惡我也。志登千仞之臺。十仞百仞而止。志惡之矣。嗟乎。天之鑒人之指。萬世之譏評。姑無論。乃吾爲吾志惡乎。奚其安。馮生再拜曰。謹受教。

悼亡賦

下妻素娟。歸予者九閱春華。一疾三載。竟逝世。音容婉轉。貞潔不亡。念予二子。隆官正九歲。存官才五歲。壯大追慕杳然。必增悲辛。乃於行狀外復賦代圖。使其如在。

光聖湖之浩漠兮。鍾婉孌而幽靜。二八通理於蹇修兮。入子執巾櫛而色頰。張嬋嫵其蒙蒙兮。簪拂拭而
豔呈。剪秋水而嫵盼兮。準梁平而垂峙乎微峯。娥曼而聯娟兮。題夸坦而中隆。倚耳而曾頰兮。頤下非鉅
而亦豐。氣蘭馥而甘如飴兮。的編貝而內瑩。面不方不圓而不長兮。卻鉛華而灼灼兮。皙隱紅。春笋尖兮。
揚皓腕。解香絲兮。烏雲委牀。梳嬾梳兮。朱錦尙裝。拖湘霞兮。風紋百行。身五尺而弱兮。雖纖小而腴充。秉
貞誠而无他兮。未哂睽之或輕。歸里肅告女君兮。請魑結而蠶春。兒戲習以嚴懲兮。靡狎愛而鬢髮。遠父
母之三千兮。從吾君之所丁。問寒煖以勤鍼紉兮。斥粥服御而佐庸。胡膏旨之微纒兮。淚流離而集裳。予
不淑以致疾兮。摺膺絡其旌。撞懨懨黃白而長眠兮。僚閭耀而掩芳。繫賦客之夸虛兮。與予心而各張。念
孩幼之長大兮。恐恍惚而若忘。一一寫真而无誑兮。庶奕世肸蠁而思成。

公舉龐魏氏呈

蠡縣紳士某某等。爲公舉節孝義婦。懇乞轉詳。題請旌表。以維風化事。竊惟懷清高築。求居住之無慚。恤
緯長吟。雖食息而不苟。蓋節義於今爲烈。而褒揚自古宜先。今本縣緒口社三甲人在龐家莊居住。已故
民龐國棟之妻魏氏。弱歲于歸。壯齡喪偶。孤鸞鳴號。欲挺身以相從。二世姑嫜。爲高堂而不死。履機手線。
織殘寒夜之霜。負耜灌園。耨徹荒原之霧。祖姑徐氏。率先守節。得躋耄年。或如廁。或迎暄。皆躬負以出入。
力牽紉。力負土。雖人代而悲辭。事繼節之董姑。亦八十而樂愷。迨其就窆。適值長霖。跣水衝泥。苦矣如蹈
河而赴海。挽轡負引。悲哉惟踊足而辟胸。行路爲之生悲。風雲於以變色。何其一心不貳。猗與三節相聯。

二女產甥。而比隣不輕步往。世載守乏。而分文弗受人憐。已而乙巳紀年。竟爾閭閻告歉。皇恩大沛。令廉吏以詳查。民瘠立蘇。開通廩而放賑。氏門冷落。官過咨嗟。乃獨見得分明。問倉糧之價。不撫躬圖報。謂居軀其能何。稽首而敬辭。願自願領以攻苦。徒食必不可。愧彼須臾之素飧。宗族感歎。擇才立嗣。士民健羨。衆口稱賢。誠女中之丈夫。實盛朝以祥瑞。某等按本婦今年六十六歲。會典可稽。想無未諧之功令。朝旌式布。應伸公舉之輿情。伏乞詳憲之候彙題。俾窮嫠高義。得邀華袞之榮。庶率土是型。彌識臣婦之道。爲此連名合詞上呈。

九日鄮城聯句序

溫益修明府。勞同巫馬。不廢八叉。陳子章詞壇才並子荆。因成五噫。呼白衣而起舞。對黃蕊以長吟。壻也自解鑄人。久慚刻燭。步折巾之筍腹。竟爾續貂。挹捻鼻於琴堂。快茲流水。豈必我江君海。掉鞅文場。抑以此笑彼歌。鼓陶摯性云爾。

九日孤城風雨秋。黃花晚對署亭幽。

溫

連霄溼翠生烏几。鋪地寒香入碧流。

李

辨業李膺推獨步。

恕谷大

學辨

新篇陳羽許誰儔。

溫

敢言避地同王粲。愛有虛懷駐馬周。吹帽偏宜金鑿落。命絃恰好玉雕鏤。

嶽

催排東閣燒林炬。漫倚南窗累酒籌。

李

徵貢夷吾人易去。班師鵬舉恨難休。

溫

烟昏戍壘天埋月。客度

盟壇水送鷗。

陳

卻笑乾坤空老大。那堪我輩自沈浮。

李

飄零嘯對霜前草。身世羞看日暮舟。

陳

凋瘵斯

民須撫字。桑麻何計蔚田疇。

溫

會時版築抒全策。且使山頽在上頭。鴨語短長喧夜漏。檐聲斷續下岑

樓穴穿蠟淚呼篴拾狼藉梓鯖倩僕收。李西望白雲邱隴夢北來鴻雁弟兄愁。溫鄉書不謂連朝至歸
念還因撫事謀。陳闌出已知皆楚舞。竭來合自有吳鉤。李今宵莫悵登高阻。歲歲茱萸共挽留。溫

